

# HOMANO

## Paoro Iokanatsopatakiti Homa Auakanimoni

<sup>1</sup> Nota Paoro iokanatsopata hītemoni. Xesosi Kristo nitirikarano nota. Teoso mereēno nota iua iokanatakiti kākitimoni nininiua īkapani. Iua akiritano nota, Teoso iokanapirena erekari kākitimoni nisāpiretini īkapani. Ikara parīkatxinoka inireka nikamini. <sup>2</sup> Kitxakapirīka Teoso sākire sāpiretakani sāpiretaua Teoso sikaenetakiti, iua iokanapirena erekari. Teoso sākire iōkatsopatakoriā ikara atatsopataāka.

<sup>3</sup> Ia Teoso iokanapirena erekari sāpiretaua aāuīte Xesosi Kristo Teoso ākiri ininiua. Kākiti itxapekaua. Iuasaaki Tavii apika mekaniri itxaua. <sup>4</sup> Iuaritika Teoso ākiri itxaua. Erekari Matamatakoti oerekari kākiti Teoso ākiri ininiua Xesosi, kotxi ōkitikari Xesosi ipīkaripeka. Iuaīkana aua itxa. Ikara posotiiretxi apiari oerekari kākiti Xesosi Teoso ākiri ininiua. <sup>5</sup> Xesosi Kristo sikaua ikinipoko erekari. Ininiā iokanataua ikini itixitimoni, kākiti isākire asāpiretini īkapani, isākire auikinina īkapani, isākire iaōka ikaminina īkapani. Ikara atoko aparīkauata Kristo īkapani.

<sup>6</sup> Hītepekana, Teoso akiritai hīte apaka Xesosi Kristo nakitiakori hininiua īkapani. <sup>7</sup> Ininiā nota iokanatsopata hītemoni Teoso tirketakinimoni, Homa sitatxiti auakanimoni. Teoso akiritai hīte iua nakitiakori hininiua īkapani. Aīri Teoso, Apiananiri Xesosi Kristo apaka sikari ikinipoko erekari hītemoni. Ikamaerekaxiniretai hīte.

*Paoro Nirekari Isini Homa Auakanimoni*

<sup>8</sup> Merepanika nitxari niTeosone: “Erekapitikai, kotxi Homa auakani iteene auikari pisākire. Ikini tōpati auakani kenakopiretari ninoa auikiniri pisākire,” nitxari Teoso Xesosi Kristo uākaā. <sup>9</sup> Nisākirauatakasaaki Teosokata, nimisākiretari Teoso hīte ĩkapani. Ātipirika nimisākiretari Teoso hīte ĩkapani. Teoso imarotari ikara nisākire atāo inini. Nota parĩkauata Teoso ĩkapani. Iuanoka ninireka nikamini. Nisāpiretari iua iokanapirena erekari imi pirena kākitimoni. <sup>10</sup> Nimisākiretakasaakiri Teoso, nitxari: “Pauiritiniāno, ninirekari paĩtiki Homa auakanimoni nisini. Mitxi !apakata ninoamoni nisini. Pinirekiniāri iuaā nisini, pimoianatano ninoamoni napokini ĩkapani,” nitxari. <sup>11</sup> Itene ninirekari naōkitinii hīte, kotxi ninirekari Teoso kamataparatiniri hākixinire nisākireē. <sup>12</sup> Ininiā nota kamataparaxiniretaiko hīte, kotxi himarotari nota iteene auikiniri Xesosi sākire. Apaka hīte kamataparaxiniretano nota, kotxi hīte apaka iteene auikari Xesosi sākire.

<sup>13</sup> Nitariakori, ninirekari himarotiniri itokatapiima naiamatama hītemoni nisini ĩkapani, txamari iusaaki !apakata nisini. Itomaneri kākiti Xoteo minakaniua ātiātaā auakani auikari Xesosi sākire. Ininiā iua atokotxikana ninirekari kaiāopokori kākiti hīte sauaki auakani apaka auikiniri Xesosi sākire. <sup>14</sup> Nisāpiretari Teoso sākire ikininapemoni. Nisāpiretari sitatxi auakanimoni. Nisāpiretari ĩtopa auakanimoni apaka. Nisāpiretari iōkatsopari imarotakanimoni. Nisāpiretari iōkatsopari mimarotakanimoni apaka. Ikara

niparīka. <sup>15</sup> Ininiã iposope nitxa nisãpiretiniri Teoso iokanapirena erekari hīte Homa sitatxiti auakanimoni apaka. Ikinika nitaparaã nisãpiretai.

<sup>16</sup> Na nipētauata Kristo iokanapirena erekari nisãpiretinii, kotxi iua iokanapirena oerekaua Teoso posotiire iua sãkire auĩākani maerekani imaktxakini ĩkapani. Kaposotiireri iua, ininiã imaktxakari ikinimane maerekani, iua sãkire auĩākani maerekani. Ikara ĩkaminana Xoteoakori merepanika. Eereka ikaminana Xoteo minakaniua apaka. <sup>17</sup> Teoso iokanapirena erekari sãpiretaua Teoso txĩkitakiniri kãkiti atão inakaranoka ikamini. Teoso sãkire auikikoãnokara, kãkiti txĩkitakaãka atão inakaranoka ikamini. Teoso sãkire iõkatsopatakori txari:

Kãkiti atão inakaranoka kamakani auini erekari,  
kotxi ninoa auikari Teoso sãkire.

### *Kãkiti Kamakiti Maerekati*

<sup>18</sup> Teoso iaxiti auakari oerekaua iua omanãkarauatini kãkiti maerekani xika, ininiãkara iua misiritariko kãkiti, kotxi kãkiti ! inirekari Teoso paniãtakiti ikamini. Ikamarina maerekatinoka. Maerekati ikamakasaakina, ikipatarina atão inakari. <sup>19</sup> Kãkiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekepekari ikamakiti kãkitimoni iua imarotinina ĩkapani. <sup>20</sup> Teoso kamari itixi, ininiã kãkiti atamatakasaakiri Teoso kamakiti, imarotari kiãtokopa itxa Teoso. Matamatakoti itxaua Teoso, iuaritika kãkiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kãkiti imarotari ikara atoko inakari itxaua Teoso, iua

kamakiti atamatakasaakina. Ininiãkara kãkiti imarotapitikari Teoso auini. Ininiãkara na atão kãkiti sãkire: “Na nimarotari Teoso auini inini.”

<sup>21</sup> Kãkiti imarotari Teoso auini, iuaritika ! isãpiretarina Teoso: “Atão Teoso pitxaua,” ! itxarina. ! Isãpiretarina Teoso: “Erekapitikari pikamakiti ate ìkapani,” ! itxarina. ! Kiĩkitena. ! Imarotaikarina atão inakari, kotxi ãkixinireëna maerekatinoka aua. <sup>22</sup> Ninoa sãkire: “Kimaroreua ate,” txamari !kiĩkitena. <sup>23</sup> Teoso mapinakatimoni ! itxana: “Pitenokara Teoso txaua,” ! itxarina. Kãkiti ipinapitika, iuaritika kamakori kãkiti atoko inakari imisãkiretana: “Pite ateosone,” itxana. Kamakori kotipiriki atoko inakari, kamakori pirãtxi atoko inakari, kamakori imini atoko inakari pakini ninoa misãkireta: “Hĩte ateosone,” itxana.

<sup>24</sup> Ininiãkara Teoso takanapana ninoa. Auiritana maerekati ikaminina ãkixinirena nirekaãkiti. Itxiko atoko itxa imaerekanina iĩtona nireëkiti. Ninoaka na paxitauana iĩtona, kotxi ãti sirĩka ãtikata. <sup>25</sup> !Inirekarina auikinirina atão inakari Teoso sãkire. Inirekarina auikinirina atão minakati. Teoso kamakitimoni itxana: “Pite ateosone. Aparĩkauata pite ìkapani,” itxana. Ikinipoko kamakarimoni !itxana: “Pite aTeosone. Aparĩkauata pite ìkapani,” !itxana. Atão inakari kamakani ãtipirika txari ikinipoko kamakari: “Peerekai pite.” Ameë.

<sup>26</sup> Ikara kãkiti maerekani xika, Teoso takanapana ninoa. Auiritana maerekati kãkiti kapëta txĩkitaãkari, iĩtona nireëkiti ikaminina. Ininiã sito na nirekaikari kikikata osirĩkini. Sito nirekari ãto sitokata osirĩkini. !Apakata. Ikara maerekati itxaua. <sup>27</sup> Iua atokokana kiki !inirekaikari sitokata

isirĩkini. Kiki nirekari āti kikikata isirĩkini. ! Apakata. Ikara maerekati itxaua. Ininiākara iĩtona misiritaākako imaerekanina xika.

<sup>28</sup> Ninoa imaroreē ! inirekarina imarotinirina Teoso, ininiā Teoso takanapana. Auiritana ixinikininirina atāo minakati. Maerekatinoka ixinikakitina, ininiā ikamarina atāo minakati.

<sup>29</sup> Ākixinireēna aua ikini sereti maerekati. Iĩtona nireēkitinoka ikamana. Ātipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni.

Ākixinireēna ixikotarina āti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aāpirena ikamana.

<sup>30</sup> Imisākirepiretarina āti. Omanatarina Teoso. ! Ipaxitarina apanakini imisākiretakasaakina. Iuikauana. Ātipirika:

“Paimatireua ate,” itxanātana. Ixinikapikarina: “Natokopa itxa apikomoni maerekati akamini.” ! Ikīpitarina iri paniātakiti, inoro paniātakiti pakini.

<sup>31</sup> ! Kiīkitena. ! Ikamarina ikamaenetakitina. ! Itiretarina inirimane. ! Inirekarina neenamtxi ixipokinina. ! Iamonīkana apanakini.

<sup>32</sup> Teoso sākire txari: “Kākiti ikara atoko inakani ipinapitikako. Ninoa ipinini atāo.” Ikara Teoso sākire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

## 2

*Teoso Misiritari Maerekati Kamakani*

<sup>1</sup> Atxiīti hīte txari: “!Erekana ninoa, kotxi ninoa kamari maerekati,” hīt<sub>x</sub>a. !Apakata ikara atoko hinini, kotxi hīte apaka kamari maerekati ninoa kamakiti atokotxikana. Ininiā !apakata kākiti akiritiniri āti kākiti maerekati kamakari ininiua. <sup>2</sup> Apakatapitika Teoso akiritiniri kākiti maerekati kamakari ininiua, kotxi iua imarotari atāo. Ininiā maerekati kamakari apakapari atāo imisiritiko imaerekani iaōka. <sup>3</sup> “Ninoa maerekati kamakani misiritaākako,” hinakasaaki, hīxinikari hīte apaka kamari maerekati ninoa kamakiti atokotxikana. Ininiā hīte apaka !hinapakakapaniri Teoso misiritinii hīte. <sup>4</sup> Atxiīti na hīte maākatari Teoso, kotxi hīte txari: “Teoso katiraōkiri itxaua,” hīt<sub>x</sub>a. Atxiīti na himaākatari Teoso, kotxi iuasaaki !imisiritapanikai hīte. Atxiīti na himaākatari Teoso, kotxi Teoso ātipirika mīteenekai hīte. Teoso nirekari hītakanapiniri maerekati hīkamakiti, erekarinoka hīkamini īkapani. Ininiā iua tiretai hīte. Ikara hīte imarotamako.

<sup>5</sup> Txamari hīte paikoxinirei. Na hinirekari himaerekani hītakanapini. Ininiā himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iuasaaki kākiti imarotariko Teoso omanākare imaerekani xika, kotxi Teoso atāo imarotari kākiti kamakiti. <sup>6</sup> Ikamakiti erekari ininiāua, Teoso sikari erekari iuamoni. Txamari ikamakiti maerekati ininiāua, Teoso misiritariko iua. <sup>7</sup> Aua kākiti ātipirika erekari kamakani. !Isāpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina īkapani.

<sup>8</sup> Apanakinipekana kamari inireẽkitinoka. ! Inirekarina atão imarotinina. Maerekatinoka inirekana ikaminina. Teoso omanatana kãkiti ikara atoko inakani. Teoso misiritanako ninoa. <sup>9</sup> Ikinipoko kãkiti maerekati kamakani maxikaãkako. Atatsiirauatako. Merepanika Xoteo misiritaãkako, eereka Xoteo minakaniuua apaka misiritaãkako. <sup>10</sup> Teoso txanako kãkiti erekari kamakani: “Erekapitikai hĩte.” Ikara atoko itxanako merepanika Xoteoakori, eereka Xoteo minakaniuua apaka. Teoso paxitanako ninoa. Ikamaerekaxiniretanako. <sup>11</sup> Teoso misiritana ikini kãkiti maerekati kamakani. ! Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

<sup>12</sup> Xoteo minakaniuua ! auari Moisesi sãkire Teoso paniãtakiti iõkatsopatakori. Ninoa kamari maerekati, ininiã Teoso paniãtakiti imimarotakanisaaki ipinana. Xoteoakori aua Teoso paniãtakiti iõkatsopatakori. Ninoa apaka kamari maerekati. Ininiã Teoso misiritana ninoa, isãkire iõkatsopatakori iaõka imakamakani xika. <sup>13</sup> Teoso kamaerekatari isãkire iaõka kamakani. Pikenakotakasaakiri Teoso sãkire, txamari ! pikamari isãkire iaõka, iusaaki Teoso ! ikamaerekatai pite. <sup>14</sup> Xoteo minakaniuua ! auari Teoso sãkire iõkatsopatakori. Iuaritika atxiĩti ikamarina Teoso paniãtakiti iõkatsopatakori iaõka, kotxi ikamarina ãkixinirena sãkire iaõka. ! Auari Teoso sãkire iõkatsopatakori ninoamoni, iuaritika Teoso paniãtakiti auape ãkixinireña. <sup>15</sup> Teoso paniãtakiti iaõka ikamakasaakina, oerekarina

imarotnirina atão inakari ãkixinireẽna. ãkixinirena sãkire sãpiretana atão. Àtikata itxana: “Pite kamari maerekati. ! Apakata.” Àtikata erekari ikamakasaakina, “Pite kamari erekari. Erekapitikari.” Itxa ãkixinirena sãkire. <sup>16</sup> Kãkiti kamakiti imarotiko õti apokako. Iuasaaki Teoso paniãtariko Xesosi Kristo sãpiretiniri kãkiti kamakiti. Kãkiti kamakiti apanakini mimarotakiniti apaka isãpireta. Iuasaaki isãpiretari kãkiti misiritiko imaerekani xika. Teoso iokanapirena erekari nisãpiretakiti oerekepekari ikara atoko inakari.

*Xoteoakori Auari Teoso Paniãtakiti Iõkatsopatakori*

<sup>17</sup> Hĩtepekana, hĩte txari: “Ate Xoteo atxaua. Teoso apakapapitikaua ate, kotxi isikari ipaniãtakiti iõkatsopatakori atemoni. Atenoka Teoso anaakori atxaua,” hĩtxa. Ininiã hĩteka iuikaua. <sup>18</sup> Hĩte imarotari Teoso nireẽkiti hĩkamini. Himarotari Teoso paniãtakiti iõkatsopatakori, ininiã himarotari erekari apiari hĩkamini. <sup>19</sup> Hĩtxari: “Atera oerekari Teoso kimapore, ikimapore mimarotakanimoni. Mõsiãreni atoko itxana ninoa,” hĩtxa. “Ate imarotari Teoso sãkire, ininiã ate imarotari apanakini aõerekini. Ininiã ate tirikapi atoko atxaua. Apanakini ipiã sikani atoko itxana ninoa.” Ikara atoko hĩtxa hĩte. <sup>20</sup> Hĩtxari: “Koerekarerini atxaua. Kãkiti miĩkiteni oereẽkani atxaua. Ate oerekari kãkiti poião imarotakani. Ate imarotari ikinipoko. Aimarotari atão, kotxi Teoso sãkire iõkatsopatakori aua atemoni.” Ikara atoko hĩtxa hĩte. <sup>21</sup> Hĩte Xoteo inakaniu a oerekari apanakini. Kinirepa kona hĩteka oerekaua apaka? Hĩte õtãkikari apanakini: “! Piĩtiriuatape”. Kinirepa hĩte na



takanapari hiitiriuatini? <sup>22</sup> Hīte ōtākikari apanakini: “!Pisirīkape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hiitirīkari ninoa teosone aikoti tii? <sup>23</sup> Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. <sup>24</sup> Teoso sākire iōkatsopatakori txari:

Hīte Xoteo xika, Xoteo minakaniuua misākirepiretari  
Teoso,  
itxa Teoso sākire iōkatsopatakori.

<sup>25</sup> Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakiniti atoko hītxaua. <sup>26</sup> Xoteo minakatiua, Teoso takaōtxikare iītoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nitakaōtxikare iītoā auakiti atokotxikana itxaua.” <sup>27</sup> Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakaniuua !auari Teoso takaōtxikare iītoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekai himaerekani.

<sup>28</sup> Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iītoā auakini, na ikinikani atāo Xoteo itxauana. <sup>29</sup> Teoso paniātakiti iōkatsopatakori !oerekaua Teoso nakiti aniniuua. Xoteo atāo inakariua, Teoso nakiti itxaua

ãkixinireẽ. Teoso takaõtxikare aua iua ãkixinireẽ. Erekaru Matamatakoti takaru Teoso takaõtxikare iua ãkixinireẽ. !Inirekaru kãkiti iuikiniri. Inirekaru Teoso iuikiniri.

### 3

#### *Teoso Kamari Ikamaenetakiti*

<sup>1</sup> Atxiiti hĩte txano nota: “Teoso apakaparu Xoteo. Teoso apakaparu Xoteo minakanuia apaka, ininiã !apiaerekata Xoteo aniniu. !Apiaerekata Teoso takaõtxikare aĩtoã auini.” Atxiiti ikaru atoko hĩtxa. Txamaru na atão. <sup>2</sup> Apiaerekatapitika Xoteo aniniu, kotxi Teoso merepitipanika sãpiretari iuaka sãkire Xoteomoni, ninoa iõkatsopatiniri ãkaparu, inĩkatinirina ãkaparu. <sup>3</sup> Iuaritika apanakini Xoteo !auikaru Teoso sãkire. Ikaru xika atxiiti Teoso !ikamaru ikamaenetakiti? <sup>4</sup> Ikamapitikaru. Atxiiti paxiraru ikinimane sãkire. Iuaritika Teoso sãkire atãonoka. Teoso sãkire iõkatsopatakori txaru:

Teoso sãkirauatakasaaki, ikinimane imarotaru isãkire atão ininiu. Isãpiretakasaakiri kãkiti imisiritiko imaerekaru xika, iusaaki imarotaãkako Teoso kamakiti atão inini.

<sup>5</sup> Atxiiti kãkiti txano nota: “Atão minakati akamakasaaki, apanakini apia imarotaru Teosonoka kaminiri atão inakaru. Ininiã erekaru akaminiri atão minakati apanakini imarotiniri Teosonoka kaminiri atão inakaru. Ininiã !apakata Teoso misiritiniu ate, maerekati akamini xika.” Atxiiti aua kãkiti ikaru atoko ina sãkiretakaru. <sup>6</sup> Apakatapitika Teoso misiritiniri maerekati kamakaru. Iua kamaru atãonoka, ininiã apakatapitika imisiritiniri ikinimane maerekati kamakaru.

7 Atxiĩti kãkiti txaua: “Atão minakati asãpiretakasaaki, apanakini imarotari Teoso sãkirenoka atão ininiua. Atão aminasãkiretakaniã, apanakini kãkiti txari: ‘Teosonoka ereka,’ itxana. Ininiã ! apakata Teoso misiritiniua amaerekani xika.” Atxiĩti aua kãkiti ikara atoko ina sãkiretakani. 8 Ikara atão ininiã, maerekati makama erekari apokini ìkapani. Txamari ikara sãkiretxiti na atão. Iuaritika apanakini apoĩtapekaua ate ikara atoko asãpiretini. Ininiã atãopitika ninoa misiritiko, isãkirena xika.

*!Auari Kãkiti Erekari*

9 Hĩxinikariko ikinika ikara nisãpiretakiti. Atauako Xoteo apiaerekata? Atauako Xoteo minakaniua poião ereka? Kona ikara atokoni itxa. Noerekapekai hĩte, Xoteo minakaniua atokokana itxa Xoteo, kotxi ikinimane kamari maerekati. Akinika ! aposotari atakanapiniri maerekati akamini. 10 Teoso sãkire iõkatsopatakori txari:

!Auari atão inakari kamakari. ãtika !auari.

11 Teoso nireẽkiti imarotakari ! auari. Teoso nirekakari !auari.

12 Ikinimane kaporĩkikari Teoso. Ikinimane kerokaři ikamakiti. Erekari kamakari ! auari. ãtika !auari.

13 Kãkiti sãkire maerekati, ìtotxi arakakari saka atoko itxa. Itotarina imisĩrienetinirina apanakini. Kãkiti sãkire imini tsiĩã atoko itxa.

14 ãtipirika imisãkirepiretarina ãti, kotxi inĩkatarina omanãkaretxi ãkixinireẽna.

15 Maxikatĩka inirekarina okinirina ãti.

16 Isinimonina imaxikana apanakini. Maerekax-inireninoka itxĩkitakana apanakini.

17 !Imarotarina neenamatchi itakanapinina.

18 !Ipaxitarina Teoso. !Ipīkarina iua.

Itxa Teoso sākire iōkatsopatakori.

19 Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini īkapani. Ininiā !apakata ate, Xoteo minakaniua pakini: “!Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. 20 Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

### *Natokopa Itxa Teoso Kamaerekatiniri Kākiti?*

21 Uatxa Teoso oerekapekaua itxīkitakiniri kākiti atāo inakari kamakani ininiua. Teoso paniātakiti ikinika ! ikama kākiti, iuaritika itxīkitakaākana atāo inakari kamakani ininiuana. Kitxakapirīka Moisesi, Teoso sākire sāpiretakani apaka sāpiretari ikara. 22 Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakaniua pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua.

23 Kotxi ikinimane kamari maerekati, ininiā ! aposota aāpokini Teoso iotximeremoni.

24 Maerekati kamakaniua ate, iuaritika Teoso sikari ikinipoko erekari maxikatiīka atemoni, ininiā Teoso kamaerekataua ate, kotxi Kristo Xesosi iīkitxirauata ate īkapani ipīkasaaki. Ininiā Teoso !imisiritaikaua amaerekani xika. 25 Teoso

sikari Xesosi ipinini kākiti ĩkapani. Xesosi ipĩkasaaki, Teoso makatxakari maerekati akamakiti. !Imisiritaikaua ate, kotxi aũuikari Xesosi ipinini ĩkitxitari Teoso, maerekati akamakiti. Teoso sikari Xesosi ipinini ate ĩkapani. Ikara oerekaua atão inakaranoka ikamini. Mitxipitipanika Teoso !imisiritana kākiti imaerekanina xika. Iãtapari iketo manapi apokini, kotxi iamoniĩkari kākiti. <sup>26</sup> Teoso sikari Xesosi, ininiã ipĩpe kākiti ĩkapani, ininiã uatxa Teoso misiritari kākiti maerekati ikamini xika, ininiã aimarotari Teoso atão inakaranoka kamakari itxaua iua, kotxi !auiritari maerekati kamakari inapakakini. Erekari Teoso, ininiã iua posotari ikamaerekatiniri kākiti Xesosi sãkire auĩãkani.

<sup>27</sup> Ininiã !apakata aũuikiniua, kotxi !auari aparĩka akamaerekatakiri, ininiã !apakata aũuikiniua Teoso paniãtakiti iõkatsopatakori akamakasaaki. Teosora kamaerekataua, Xesosi sãkire aũuikasaaki. <sup>28</sup> Teoso paniãtakiti iõkatsopatakori kamakari atxiĩti !ikamaerekataãka, kotxi !auikari Xesosi sãkire. Xesosi sãkire auikakaranoka ikamaerekataãka. <sup>29</sup> Atauako Teoso Xoteo Teosonenanini itxataua? Konapitini. Xoteo minakanuia Teosonekanera apaka itxaua Teoso. <sup>30</sup> Teoso atinoka aua. Iua kamaerekatana Xoteo, Xesosi sãkire auĩãkani. Iua kamaerekatana Xoteo minakanuia apaka, Xesosi sãkire auikasaakina. <sup>31</sup> Ikara atoko ininiã, atxiĩti kākiti txari: “Teoso kamaerekataua ate, kotxi aũuikari Xesosi sãkire, ininiã Teoso paniãtakiti iõkatsopatakori !itxaika. Ininiã !akamaikari,” itxa kākiti sãkire atxiĩti. Konapitini. Xesosi sãkire aũuikasaaki, anirekari iteene akaminiri Teoso sãkire paniãtakiti iõkatsopatakori.

## 4

*Atão Inakari Kamakari Apraão*

<sup>1</sup> Maxinikari Apraão aĩri kitxakapirĩkari. Natokopa itxa iua imarotakiti, Teoso kamaerekatiniri kãkiti? <sup>2</sup> Apraão kamakiti erekari kamaerekataãkamariko iua, ininiã iua iuikamauako. Txamari iua iuikiniua ! auari Teoso apisatoõ.

<sup>3</sup> Teoso sãkire iõkatsopatakori txari:

Apraão auikari Teoso sãkire, ininiãkara Teoso txĩkitakari iua atão inakari kamakari ininiua.

<sup>4</sup> Parĩkauatakarĩ ipatrãote sikari iparĩka ĩki iuamoni. Maxikatiĩka ! iĩkitxitari iua. Isikari, kotxi iparĩkauata. <sup>5</sup> Kãkiti auikiniãri Teoso kamaerekatiniri maerekati kamakari, iua kãkiti ! iuikari iuaka parĩka. Imarotari iparĩka ! ikamaerekatari iua. Teoso txĩkitakari ikara atoko inakari kãkiti atão inakari kamakari ininiua, kotxi iua auikari Teoso sãkire. <sup>6</sup> Kitxakapirĩka Tavii txari ikara atoko. Iua sãpiretari kãkiti Teoso sikakiti erekari apakapakani. Teoso txĩkitakari iua atão inakari kamakari ininiua. Na iparĩkani txĩkitakari iua atão inakari kamakari ininiua. <sup>7</sup> Tavii txari:

Teoso makatxakasaakiri kãkiti maerekani, ! atamataikari maerekati ikamakiti. Teoso takari ikinipoko erekari kãkiti ikara atoko inakarimoni.

<sup>8</sup> Teoso ! iaõtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirĩka.

<sup>9</sup> Atxiĩti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtxikare auaĩtotakiti ĩkapaninanini?” Konapitini. Ia erekari Teoso sikakiti Teoso takaõtxikare mauaĩtotakini

Īkapani apaka. Nisāpiretapekai ia Teoso sākire iōkatsopatakori:

Apraão auikari Teoso sākire, ininiākara Teoso txīkitakari iua atão inakari kamakari ininiua,

itxa Teoso sākire iōkatsopatakori. <sup>10</sup> Kirisaakipa Teoso txīkitakari Apraão atão inakari kamakari ininiua? Atauako Teoso takaōtxikare Apraão ĩtoã auakasaakiikani? Konapitini. Takaōtxikari Apraão ĩtoã takiko apisapanikara, itxīkitakari Apraão atão inakari kamakari ininiua.

<sup>11</sup> Merepanika Teoso txīkitakari Apraão atão inakari kamakari ininiua, eerekaikara itakari itakaōtxikare ĩtoã. Ikara Teoso takaōtxikare oerekari, mitxipeka Teoso txīkitakari Apraão atão inakari kamakari ininiua, kotxi iua auikari Teoso sākire. Apraão auikari Teoso sākire, Teoso takaōtxikare ĩtoã auini apisapanika. Ininiã Apraão ikini Teoso sākire auĩākani iri atoko itxaua. Atxiĩti Teoso takaōtxikare ĩtoãna !auari. Iuaritika ninoa iri atoko itxaua Apraão. Teoso txīkitakari ikinimane iua sākire auĩākani atão inakari kamakani ininiuana. <sup>12</sup> Apraão Teoso takaōtxikare auaiťotakini iri atoko itxaua, ninoa auikiniãri Apraão sākire Apraão auikiniri atokotxikana, kotxi Teoso auikari Teoso sākire Teoso takaōtxikare ĩtoã auini apisapanika.

<sup>13</sup> Teoso sikaenetari itixi Apraãomoni, imekaniriakori pakinimoni. Ikara atoko Teoso sākire, kotxi Apraão auikari Teoso sākire. Iua auikari Teoso sākire, ininiã Teoso txīkitakari iua atão inakari kamakari ininiua. Apraão kamakiti erekari !itxīkitakari Teoso sikaenetiniri itixi Apraãomoni. <sup>14</sup> Kãkiti erekari kamakari

Teoso sãkire mauĩãkati ! apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auĩãkanimoninani. <sup>15</sup> Teoso paniãtakiti iõkatsopatakori makamakati misiritaãkako. Teoso paniãtakiti iõkatsopatakori mauakaniã, maerekati !auari. Txamari auapitika Teoso paniãtakiti iõkatsopatakori.

<sup>16</sup> Ininiã kãkiti auikasaakiri Xesosi sãkire, apakapari Teoso sikaenetakiti. Maerekati kamakani kãkiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kãkitimoni. Ininiã ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniãtakiti iõkatsopatakori auakini apakapari. Xoteo minakaniuua Teoso sãkire Apraão auikini atoko inakani apaka apakapari. Ate amakinika iri atoko itxaua Apraão. <sup>17</sup> Teoso sãkire iõkatsopatakori txari:

Teoso txari Apraão: “Nota txĩkitakaiko pite itori ãti uãka iri pininiua.”

Ininiã Teosomoni iua aĩri atoko itxaua, kotxi Apraão auikari Teoso sãkire. Teoso txĩkitakana ipĩkani iuaĩkana auãki inini. Iua kamari mitxi mauakati auini.

<sup>18</sup> Apraão kiomãtxipeka inakasaaki, kona keeneri. Iuaritika auikari Teoso sãkire. Iãtapari Teoso sikaenetakiti apokini. Ininiã apanakini ãti uãka iri atoko itxapekaua Teoso sãkire iaõka. Teoso sãkire iõkatsopatakori txari:

Papika mekaniriakori kaiãopokopaniriko.

<sup>19</sup> Apraão seĩ anokanani inakasaaki, imarotari iĩto ipinanapanoka inini. Imarotari Sara !oposotaikari keene onini. Iuaritika iteene auikari



Teoso sãkire. <sup>20</sup> !Iotoka auikiniri Teoso sikiniri isikaenetakiti iuamoni. Iua auikari Teoso sãkire itaparaxinireritika. “Teoso posotari ikinipoko ikamini,” itxa. <sup>21</sup> Iua iteene imarotari Teoso posotiniri isikiniri isikaenetakiti. <sup>22</sup> Apraão auikari Teoso sãkire, ininiãkara Teoso txĩkitakari iua atão inakari kamakari ininiua. <sup>23</sup> Na Apraõnanini Teoso txĩkitaka atão inakari kamakari ininiua. <sup>24</sup> Iua txĩkitakaua ate apaka atão inakari kamakani aniniua, aãuikiniãri Teoso sãkire. Aãuĩte Xesosi ipĩkasaaki, Teoso õkitikari iua iuaĩkana auini ĩkapani. <sup>25</sup> Teoso sikari Xesosi kãkitimoni ipinini ĩkapani maerekati akamakiti xika. Teoso õkitikari iua iuaĩkana auãki inini ĩkapani, ate ikamaerekatini ĩkapani.

## 5

### *Teoso !Omanataikaua Ate*

<sup>1</sup> Ininiã Teoso kamaerekataua, kotxi aãuikari isãkire, ininiãkara aãuĩte Xesosi Kristo iotokakari Teoso omanatiniua ate. Teoso !omanataikaua ate. Uatxa apakapaua ate. <sup>2</sup> Aãuikasaakiri Xesosi sãkire, iuasaaki aimarotari ikinipoko erekari Teoso sikakiti atemoni ikiniõtika. Itene apoxokoniuaata, kotxi aiãtapari Teoso aaõkitini, iua iotximere aãtamatiini ĩkapani. <sup>3</sup> Apanakini misiritakasaakiua, apoxokoniuaata apaka, kotxi Teoso oerekaua amĩteenekiniri amisiritiko. <sup>4</sup> Amisiritiko amĩteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. <sup>5</sup> Erekari apokini aiãtapiniã, aãpakapapitikariko erekari, kotxi aãkixinireẽ aimarotari Teoso iteene tiretiniua. Erekari

Matamatakoti Teoso sikakiti atemoni, oerekaua Teoso tiraõki aãkixinireẽ.

<sup>6</sup> Erekari akamini amaposotakanisaaki, Teoso amanirekakanisaaki, Kristo ipina ate ìkapani. Iua ipina iketo õti manapi. <sup>7</sup> Atxiĩti kãkiti ipina atão inakari kamakari ìkapani iua mapinakani ìkapani? Atxiĩti ! ipina iua ìkapani. Atxiĩti kãkiti ipina ãti erekari kamakari ìkapani, iua mapinakani ìkapani? Atxiĩti ipina iua ìkapani. <sup>8</sup> Teoso oerekaua ate, iua iteene tiretiniua ate, kotxi Kristo ipina ate ìkapani maerekati akamapanika anakasaaki.

<sup>9</sup> Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminaua, kotxi Teoso ! omanataikaua. ! Imisiritaikaua. <sup>10</sup> Ate Teoso omanatakani anakasaakiua, Teoso ãkiri ipina ate ìkapani. Ininiã Teoso mokaiakari ! atxaikaua. Iua apakapaua. Iua apakapaua, ininiã amaerekani imakatzaka, ininiã aãuapininiika, kotxi iua õkitikaua auapininiika anini ìkapani Teosokata, kotxi Kristo auini auapika. <sup>11</sup> Teoso kamari ikara ate ìkapani. Apikomoni iua kaminapanikauako ate, kotxi iua kamapoxokonitaua, kotxi aãũte Xesosi Kristo mikanapiriãua ate Teosomoni.

### *Adão, Kristo Pakini*

<sup>12</sup> Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. <sup>13</sup> Teoso paniãtakiti iõkatsopatakori apokini apisapanika, kãkiti kamari maerekati, iuaritika Teoso ! imisiritana ninoa maerekati ikamakitina xika, kotxi iusaaki ! isãpiretapanikari ipaniãtakiti. <sup>14</sup> Adão auakasaaki

atoko, Moisesi auakasaaki manapi, iuasaaki Teoso paniātakiti iōkatsopatakori !apokapanika, iuaritika ikinimane ipina. Atxiīti kākiti !ikamari maerekati Adão maerekani atoko, kotxi iua !ikamari Teoso paniātakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

<sup>15</sup> Txamari aimarotari iua na Xesosi !atokoni itx-  
 aua, kotxi ātika kiki maerekani xika, itori kākiti ip-  
 ina. Iua sikari ipīkitxi kākitimoni. Kiki ātipekana, Xe-  
 sosi Kristopekana, iua sikari erekari Teoso siākiti  
 itori kākitimoni imapinakanina ikapani. Teoso  
 siākiti iiki !auari. !Erekari Adão sikakiti. Peerekari  
 Xesosi Kristo siāki. <sup>16</sup> Kiki ātika Adão inakori ka-  
 mari maerekati. Ātinoka maerekati ikama, ininiā  
 eereka Teoso sāpiretari imaerekani. Eereka Teoso  
 misiritari iua. Teoso siākiti !ikara atokoni itxa.  
 Kākiti maerekati itori ikamakasaaki, kiki ātipekana  
 Xesosi sikari Teoso siākiti kākitimoni, ininiā ika-  
 maerekatana kākiti. Iuasaaki imakaxakari ninoā  
 maerekani. <sup>17</sup> Kiki ātika, Adão inakori maerekani  
 xika, Teoso txīkitakari ikinimane ipinini. !Erekari  
 iua kiki kamakiti. Āti kiki, Xesosi Kristo inakori  
 kamakiti peerekari. Iua txīkitakari kākiti ākixinire  
 katapara inini maerekati imakamakani ikapani.  
 Kākiti ikara atoko inakari Teoso sikari ikinipoko  
 erekari. Itori isika. Itxīkitakari iua atāo inakari  
 kamakari ininiua. Ia iparīka iiki !auari.

<sup>18</sup> Adão kamari ātinoka maerekati, iuaritika  
 iua maerekati txīkitakari Teoso misiritinina  
 ikinika kākiti. Iua atokokana Xesosi kamakiti  
 ātika txīkitakari Teoso kamaerekatinina kākiti  
 ninoā ātipirika auini ikapani. Iuasaaki atāonoka  
 ikamakiti. <sup>19</sup> Kiki ātika Adão inakori na kamari  
 Teoso sākire iaōka, ininiā itxīkitakari kākiti

itomaneri maerekati ikaminina. Kiki ãtipekana Xesosi inakori kamari Teoso sãkire iaõka, ininiã itxĩkitakari kãkiti itomaneri atão inakari kamakani ininiuana.

<sup>20</sup> Teoso sikari ipaniãtakiti iõkatsopatakori Moisesimoni. Iuasaaki kãkiti imarotari maerekati itori ikamakitina, ininiã maerekanitxi apiaãpota, kotxi Teoso paniãtakiti iõkatsopatakori auape. Maerekanitxi apiaãpota, iuaritika erekari Teoso sikakiti kãkitimoni apiata. <sup>21</sup> Maerekanitxi txĩkitakari kãkiti ipinini. Erekari Teoso sikakiti kãkitimoni txĩkitakari kãkiti auini ãtipirika imaxipokakani tĩkane, kotxi aãũte Xesosi Kristo txĩkitakari kãkiti atão inakari kamakari ininiu. Ininiãkara kãkiti auapininiika, kotxi Xesosi Kristo kamaerekatana.

## 6

### *!Anirekaikari Maerekati Akamini*

<sup>1</sup> Ininiã erekari atxiĩti apikomoni maerekati akamini, ikinipoko erekari Teoso sikakiti apiata auini ĩkapani? <sup>2</sup> Konapitini. Teoso makatxakapekari amaerekani, kotxi iuasaaki ! anirekaikari apikomoni maerekati akamini. Anireẽkiti maerekati akamini xipope, kãkiti ipinini atoko itxa ixipokini. Ininiã ! apakata apikomoni maerekati akamini. <sup>3</sup> Apatxisatiko oerekari Kristo Xesosi nakitiakori aniniu. luakata apinini atoko itxa apatxisatiko. Himarotapekari ikara. <sup>4</sup> Apatxisatiko oerekari Kristokata ikatakoni atoko aniniu, ininiã ! anirekari apikomoni maerekati akamini. Kristo iri Teoso posotiire õkitikari imi, iuaĩkana auãki inini ĩkapani. Peerekari iposotiire. Ininiã apatxisatiko

oerekari Xesosi ōkitikiko atokokana Teoso ōkitikaua ate aāuini amaneri inini ĩkapani.

<sup>5</sup> Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaĭkana auini atokokana, aāuini amaneri. Peerekari, kotxi aāuapika Kristokata, ātika atoko aniniua iuakata. <sup>6</sup> Mitxi anireēkiti xipope, kotxi Kristo makatxakari amaerekani aamina ĩpiriāmitakari nopini ipĭkasaaki ate ĩkapani. Ininiā mitxi anireēkiti posotiire ! auaike. Ixipokaākepeka, kotxi mitxi anireēkiti maerekanitxi nitiriakori atoko ! atxaikaua. Aimarotari ikara. <sup>7</sup> Maerekanitxi na paniātaikari kākiti ipĭkari.

<sup>8</sup> Kristokata ipĭkani atoko aniniā, aimarotari iuakata aāuini apaka. <sup>9</sup> Ipĭkasaaki ōkitikaāka, ininiā ! ipinaika. Aimarotari ikara. Ipĭkitxi na kaposotiireikari iuaĭkana Kristo ipinini ĩkapani. <sup>10</sup> Iua ipina maerekanitxi posotiire ixipokini ĩkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini ĩkapani. <sup>11</sup> Iua atokotxikana anireēkiti maerekati xipope. Uatxa ! anirekaikari maerekati akamini. Uatxa aāuapininiika Teosokata, iua nireēkitinoka akamini ĩkapani, kotxi Kristo Xesosikata aāuapika.

<sup>12</sup> Ininiā na hāuiritapiri hīto paniātini maerekati hĭkamini. Na hĭkamapiri maerekati hīto nireēkiti. <sup>13</sup> Na hāuiritapiri hīto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hūako kaminiri maerekati. Na hĭkamapiri maerekati hīto nireēkiti. Hĭteka

h̄sikauako Teosomoni, kotxi mitxi ip̄kani atoko h̄txaua, eereka Teoso tx̄kitakai aūaki iuākana hinini, ininiã h̄sikari h̄ito ikinika Teosomoni. Atão inakaranoka h̄kamako h̄okiã, hinamaã, h̄uakoã, imakinika h̄itoã. <sup>14</sup> Uatxa maerekanitxi apatrãote atoko !itxaikauako. Uatxa amisiritiko ! auaika, Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, iusaaki imakatzakari amisiritiko.

### *Atão Inakari Nitiriakori*

<sup>15</sup> Ininiã atxīiti h̄txano nota: “Maerekati makama, kotxi amisiritiko ! auaika Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, imakatzakari amisiritiko. Ininiã makamari maerekati,” atxa atxīiti. Konapitini. <sup>16</sup> Himarotari, h̄ãuiritiniãri kãkiti paniãtinii iua nireẽkiti h̄kamini, ininiã iua h̄ipatrãote atoko itxaua. Iua nitiriakori atoko h̄txaua, kotxi h̄kamari iua paniãtakiti. Maerekanitxi h̄ipatrãote ininiãua, h̄kamari maerekati, ininiã h̄pina. Ininiã kona h̄ua Teosokata ãtipirika. Teoso h̄ipatrãote ininiãua, iua paniãtakiti h̄kama, ininiã atão inakaranoka h̄kama. <sup>17</sup> Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko h̄txaua. Uatxa maerekanitxi nitiriakori !h̄txaikaua, kotxi iteene h̄k̄ipitari h̄õerekiko. <sup>18</sup> Teoso makatzakapekai h̄ite, ininiã uatxa maerekanitxi nitiriakori !h̄txaikaua. Uatxa Teoso nitiriakori h̄txaua, ininiã atão inakaranoka h̄kama. <sup>19</sup> Ikara atoko nitxa sãkireta h̄temoni, kotxi himarotari nitiritxi, patrão pakini pirena. Himarotakiti poiãoka. M̄itxi h̄ãuiritari

hĩto kaminiri maerekati inireẽkiti. Hãuiritari hĩto apikomoni maerekati ikamaãpotini. Apiaãpota maerekati hĩkamakiti. Iuasaaki hĩto maerekanitxi nitiri atoko itxaua. Uatxa hĩsikari hĩto Teosomoni atão inakari nitiri ininiua ĩkapani, ininiã hĩkamariko atão inakarinoka. Ininiã Teoso nakitiakorinoka hĩtxaua.

<sup>20</sup> Maerekanitxi nitiriakori hinakasaakua, atão inakari nitiriakori na hĩtxaua, ininiã atão inakari na paniãtai hĩte atão inakarinoka hĩkamini. <sup>21</sup> ĩkiripa erekari hãpakapa, maerekati mitxi hĩkamakasaaki? Kona kapakaparei. Uatxa hĩpẽtauata maerekati mitxi hĩkamakiti xika. Maerekati kamiko xika kãkiti ipina, ininiã kona aua Teosokata ãtipirika. <sup>22</sup> Uatxa maerekanitxi na paniãtaikai hĩte. Uatxa Teoso nitiriakori hĩtxapekua, ininiã hĩkamari ikinipoko Teoso ĩkapani. Ininiã hãuapininiika hĩtxako Teosokata ãtipirika. <sup>23</sup> Maerekanitxi kãkiti patrãote atoko itxa. ĩkitxitari kãkiti parĩkatxi ĩki, txamari ipĩkitxi itxaua parĩkatxi ĩki. Teoso sikakiti atemoni ãtião. ! Aparĩkauata Teoso sikakiti aãpakapini ĩkapani, iuaritika isikaua aãuini ãtipirika inini ĩkapani, kotxi aãũte Xesosi Kristo ipina ate ĩkapani.

## 7

### *Tanirauatakaro Atoko Atxa*

<sup>1</sup> Nitiriakori, hĩte hĩkinika imarotari paniãtakori iõkatsopatakori, ininiã himarotari nisãkire. Kãkiti auapanika inakasaaki, ikĩpitariko paniãtakori iõkatsopatakori. <sup>2</sup> Noerekaiko hĩte. Paniãtakori iõkatsopatakori paniãtaro sito okaikotini oĩtanirikata iua auapanika inakasaaki. Iua ipininiã, iua

paniãtakori na paniãtaikaro oa. <sup>3</sup> Õtaniri auapanika inakasaaki, ãtikata oãuiniã, kanokarero otxaua. Õtaniri ipininiã, paniãtakori iõkatsopatakori na paniãtaikaro oa, ininiã apakata ãtikata oïtaniriuatini. Ìkara atoko oniniã, kanokarero !otxaua.

<sup>4</sup> Nitariakori, oa sito atokotxikana ate amakinika. Kristo ipina ate ìkapani, ininiã Moisesi paniãtakiti iõkatsopatakori kona paniãtaikaua, kotxi uatxa Kristo nakitiakori atxaua. Uatxa Teoso õkitikakiti Kristo nakitiakori atxaua. Iua nakitiakori atxaua, ininiã erekari akama Teoso ìkapani. <sup>5</sup> Mitxi anireëkiti maerekati paniãtaua maerekati akamini. Aïto nirekari maerekatinoka ikamini, kotxi paniãtakori iõkatsopatakori txari: “Kona hïkamapiri maerekati.” Ininiã iusaaki apiata anirekari maerekati akamini, kotxi maerekatinoka kamakani atxaua. Ininiã apina, ininiã kona aãuapika Teosokata. <sup>6</sup> Mitxi paniãtakori iõkatsopatakori nirekari ipaniãtiniua. Uatxa paniãtakori iõkatsopatakori na paniãtaikaua. Ikara kitxakari. Uatxa amaneri, kotxi uatxa aparïkauata Teoso ìkapani. Erekari Matamatakoti oerekaua aparïkauatini Teoso ìkapani.

### *Teoso Paniãtakiti Iõkatsopatakori*

<sup>7</sup> Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxiïti? Konapitini. Maerekati !itxaua. Teoso paniãtakiti iõkatsopatakori mauakanimako, nota !imarotamariko maerekati nikamini. Teoso paniãtakiti iõkatsopatakori txari:

Kona pinirekapiri ãti nakiti, ininiã ãti nakiti ninirekiniã, nimarotari nikaminiri maerekati. <sup>8</sup> Maerekati xika na nota



nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari:

Kona pinirekapiri ãti nakiti.

Teoso paniãtakiti iõkatsopatakori mauakaniã, iusaaki maerekati ! auari. <sup>9</sup> Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatari nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. <sup>10</sup> Iusaakipeka nimarotari nãkixinire ipikari atoko inini. Teoso paniãtakiti iõkatsopatakori oerekari kãkiti erekari ikamini, iua auini ikapani. Txamari Teoso paniãtakiti iõkatsopatakori oerekano nota nipinini nimaerekani xika. <sup>11</sup> Maerekati ninireẽkiti misirienetano. Imisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

<sup>12</sup> Teoso paniãtakiti iõkatsopatakori ! auari maerekati, kotxi Teoso kamari. Atãonoka itxa Teoso paniãtakiti. Erekari. <sup>13</sup> Atxiiti erekari txikitakano nipinini? Konapitini. Maerekanitxi txikitakano nipinini. Maerekanitxi txikitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txikitakano nipinini. Ininiã aimarotari maerekanitxi kona xatiki apakata. Maerekatinoka, kotxi maerekanitxi txikitakano nipinini. Teoso

paniãtakiti iõkatsopatakori oerekaua ikara atoko inakari.

<sup>14</sup> Aimarotari Teoso paniãtakiti iõkatsopatakori iaxiti ãkari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ãkapani. <sup>15</sup> Na nimarotari nikamakiti, kotxi na nikamari notaka nireëkiti. Nikamari nimanirekakiniti, no-manatakiti. <sup>16</sup> Ininiã maerekati nimanirekakiniti nikamakasaaki, iuasaaki nimarotari Teoso paniãtakiti iõkatsopatakori ereka inini. <sup>17</sup> Ininiã na notani kamari maerekati. Maerekati nãkixinireë auakarira txãkitakari nikaminiri iua maerekati. <sup>18</sup> Nimarotari erekari ! auari nãkixinireë. Maerekatinoka aua nãkixinireë, kotxi ninirekari erekari nikamini, txamari ! niposotari. <sup>19</sup> Na nikamari erekari ninireëkiti. Nikamapikari maerekati nimanirekakiniti. <sup>20</sup> Ininiã nimanirekakiniti nikaminiã, kona notani kamari. Maerekati nãkixinireë auakarira txãkitakano iua maerekati nikamini.

<sup>21</sup> Ininiã ia sãkiretxiti atão: Ninirekasaakiri erekari nikamini, maerekatinoka niposota nikamini. <sup>22</sup> Nãkixinireë iteene ninirekari Teoso paniãtakiti iõkatsopatakori iaõka nikamini. <sup>23</sup> Txamari aua ãti ninireëkiti niõto ãki. Iua niõto nireëkiti nirekari ixipokiniri nãkixinire nireëkiti. Iua niõto nireëkiti xika nikamari maerekati nireëkitinoka. ! Niposotari erekari nikamini. Kateia ãki iaxirikakoni atoko nitxa. <sup>24</sup> !Erekano nota. Maerekati kamakarino nota. Kipa makatxakano, maerekati niõto nireëkiti nimakamakani ãkapani? Niõto txãkitakano nipinini. Kipa moianatano? <sup>25</sup> Aãuõte Xesosi Kristokara moianatano. Iuara makatxakano nimapinakani

ĭkapani. Peerekari Teoso, kotxi iua kamari ikara atoko nota ĭkapani.

Ininiã uatxa ia atoko inakari nisãpiretai. Nãkixinireẽ ninirekari Teoso paniãtakiti iõkatsopatakori nikamini. Txamari niĩtoã maerekanitxi nireẽkitinoka niposota nikamini.

## 8

### *Erekari Matamatakoti Txĩkitakari Aãkixinire Auãki Inini*

<sup>1</sup> Ininiã uatxa Teoso !itxaikaua ate: “Maerekati hĩkamakiti xika nimisiritaiko hĩte,” !itxaikaua ate, kotxi Kristo Xesosi nakitiakori atxapekaua. ! Akamaikari aĩto nireẽkiti. Erekari Matamatakoti sikaposotiiretaua iua nireẽkiti akamini. <sup>2</sup> Erekari Matamatakoti nireẽkiti akama, ininiã iua txĩkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireẽkiti nikamini, ininiã na nipina. <sup>3</sup> Aĩto maerekani xika Teoso paniãtakiti iõkatsopatakori ! iposotari imaktxakiniri amaerekani, kotxi ! aposotari akaminiri iua paniãtakiti. Iuaritika Teoso makatxakari amaerekani, kotxi iua iokanatarari imi atemoni. Imi ĩto ate ĩto atoko, maerekati kamakari ĩto atoko itxa. Teoso iokanatarari imi atemoni ipinini ĭkapani, amaerekani imaktxakini ĭkapani. Ininiã ixipokari maerekati posotiire aĩtoã auakari. <sup>4</sup> Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ĭkapani, kotxi ipaniãtakiti atão inakaranoka. Ininiã !akamaikari maerekati aĩto nireẽkiti. Akamari Erekari Matamatakoti nireẽkiti.

<sup>5</sup> Ītotxi nireēkiti kamakani xinikapikari iītona nireēkitinoka. Erekarī Matamatakoti nireēkiti kamakani xinikapikari Erekarī Matamatakoti nireēkitinoka. <sup>6</sup> Kākiti xinikiniāri iīto nireēkitinoka, ixinikakiti txīkitakari iua ipinini, ininiākara kona auapika Teosokata. Kākiti auiritiniāri Erekarī Matamatakoti txīkitakiniri ixinikiniri Erekarī Matamatakoti nireēkitinoka, iua auapininiika Teosokata. Erekarīnireri iua. <sup>7</sup> Kākiti xinikiniāri iīto nireēkitinoka, Teoso mokaiakariakori itxauana, kotxi ! inirekarina Teoso paniātakiti iaōka ikaminina. ! Iposotarina Teoso paniātakiti iaōka ikaminina. <sup>8</sup> Ītotxi nireēkitinoka kamakani ! iposotari ikamapoxokonitirinina Teoso.

<sup>9</sup> Hītepekana, Erekarī Matamatakoti hākixinire auiniā, hīkamari iua paniātakiti. ! Hīkamari maerekati hīto paniātakiti. Erekarī Matamatakoti kākiti ākixinireē mauakanisaaki, na Kristo nakitiakori ! itxauana, kotxi Erekarī Matamatakoti Kristo nakiti itxaua. <sup>10</sup> Hīto ipinapitikako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakaranoka ate īkapani. <sup>11</sup> Teoso ōkitikari Xesosi, iua ipīkasaaki. Erekarī Matamatakoti Teoso nakiti hākixinireē auiniā, Teoso Kristo ōkitikakari, txīkitakariko hīto ipinakari iuaīkana auāki inini, kotxi Erekarī Matamatakoti Teoso nakiti aua hākixinireē.

<sup>12</sup> Ininiā nitariakori, auapitika akamakiti tūkane Teoso īkapani. ! Auari akamakiti tūkane aīto nireēkiti akamini īkapani. <sup>13</sup> Hīto nireēkiti hīkaminiā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekarī

Matamatakoti maerekati hiïto kamakiti ixipokini, iusaaki hãuapika ãtipirika Teosokata.

<sup>14</sup> Erekarî Matamatakoti nireëkiti kamakani, Teoso anaakori itxauana, kotxi Erekarî Matamatakoti Teoso nakiti. <sup>15</sup> Iua Erekarî Matamatakoti Teoso sikakiti hïtemoni. !Itxïkitakai nitiritxi kapïkareri hininiua. Itxïkitakai Teoso anaakori hininiua. Erekarî Matamatakoti posotiireë aãkiritari aïri Teoso: “Papai, niri,” atxari. <sup>16</sup> Erekarî Matamatakoti sãpiretaua aãkixinireë Teoso anaakori aniniua. <sup>17</sup> Teoso anaakori aniniãua, aãpakapariko erekarî Teoso nïkatakiti ate ïkapani. Kristo apakapari erekarî Teoso nïkatakiti iua ïkapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auïte inakasaakiaua, ate apaka aua iuakata iusaaki. Aãtamatarî iua iotximere. Peerekarî iusaaki iuakata aãuini.

### *Aãpakapariko Ikinipoko Erekarî*

<sup>18</sup> Uai itixi aãuakasaaki, aãtatsiirauata. Eereka ! axinikaikari mitxi aãtatsiirauatini, kotxi Teoso oerekauako ikinipoko erekarî. Iusaaki peerekarî. <sup>19</sup> Ikinipoko Teoso kamakiti iãtapari ipoxokoniritika Teoso keto õti. Iusaaki aimarotari Teoso anaakori. <sup>20</sup> Kotxi ikinipoko Teoso kamakiti misiritaãkapeka, ixipokaãpotini tïkane. Ikinipoko Teoso kamakiti ixinireka ! ixipokaãpota. Teoso txïkitakari ikinipoko xipokaãpotini. Iuaritika aimarotari, ipïkitxi xipokini õti apokapitikako. <sup>21</sup> Ikinika Teoso kamakiti iãtapari iua õti. Iusaakiko itixi amaneri itxauako. !Ixipokaika. Iusaaki ikinika amaneri.

!Ixiokaika. Teoso anaakori misiritiko !auaika. Peerekari iuasaakiko.

<sup>22</sup> Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. <sup>23</sup> Na itixi Teoso kamakitananini atatsiirauata. Aãkixinire apaka akiripireta, kotxi anirekari Teoso keto apokini. Iuasaaki iua apakapaua ate iua anaakori. Iuasaakiko aïto amaneri isikaua. Iuasaakiko aïto !kaxiporeikari. Merepanika Teoso sikakiti auapeka atemoni, kotxi iua sikapekari Erekarî Matamatakoti atemoni. <sup>24</sup> Teoso makatxakapekari amaerekani, aãuikasaakiri isãkire. Ininiã aiãtapari apikomoni isikaenetakiti atemoni. ! Aãtamatanpanikari isikaenetakiti, ininiã aiãtapapanikari. Aãuikapitikari isikaenetakiti isikiniua, ininiã atão aãuikiniri. <sup>25</sup> Aiãtapari aãpakapakiti tĩkane. !Aãpakapapanikari, iuaritika aiãtapari apoxokoniritika, kotxi aimarotapitikari ikara apokini.

<sup>26</sup> Erekarî Matamatakoti moianataua, kotxi na kataparaxinireua. !Aimarotari aamanaãkiti tĩkane, Teoso amisãkiretakasaaki. Iuaritika, Erekarî Matamatakoti misãkiretari Teoso ate ïkapani. Asãkireẽ !aposotari asãpiretiniri Teoso ikinika anireẽkiti, ininiã Erekarî Matamatakoti misãkiretari Teoso ate ïkapani. Ipinimoni itxa isãpiretiniri Teoso. Kãkiti sãkireẽ ! isãkirauata Teosokata. <sup>27</sup> Teoso imarotari kãkiti ãkixinire, ininiã iua imarotari Erekarî Matamatakoti xinikakiti, kotxi Erekarî Matamatakoti misãkiretari Teoso, Teoso nakitiakori ïkapani. Erekarî Matamatakoti amanaãri Teoso, Teoso nireẽkiti ikaminana inakitiakori.

*Teoso Iteene Tiretiniua*

28 Aimarotari ikiniōtika erekari ikaminaua ate, kotxi iua tirketakani, iua mereēkini atxaua ate. Iuaritika aātatsiirauatini auapitika. Iuaritika iuasaaki apaka erekari ikaminaua. Iua mereēua, kotxi inirekari imereiniua. 29 Itixi kamiko apisapanika Teoso imarotapekaua ate. Iua mereēpekaua ate, iua anaakori kaiāopokori aniniua ĩkapani. Imereēpekaua, imi Xesosi atoko aniniua ĩkapani. Ininiā Xesosi aītari apiari. 30 Teoso akiritana imereēkini. Apaka ikamaerekatana iua mereēkini. Apaka itanapoko erekari isika ninoa ikamaerekatakinimoni.

31 Teoso kamari ikinipoko ikara erekari ate ĩkapani, ininiā natokopa itxa axinikakiti? Teoso kataparari moianatapitikaua, ininiā ate omanatakani tapara poiāoka. 32 Teoso sikari ikinipoko atemoni. Imi apaka isika atemoni, kotxi ipina ate akinika ĩkapani. Isikari imi atemoni, ininiā aua atxiīti iua masakakiniti atemoni? !Auari. Ikinipoko erekari isikapitikaua atemoni. Ikarone !auari. 33 Aua atxiīti Teoso mereēkini maerekani sāpiretakari? !Auari. Teosora sāpiretari ninoa maerekani mauakani, kotxi iua kamaerekatapekana ninoa. 34 Aua atxiīti Teoso mereēkini misiritiko sāpiretakari? !Auari. Kotxi Kristora misākiretari Teoso ate ĩkapani, kotxi Teoso ikikomoni auakari itxaua. Iua ipina ate ĩkapani, ininiā eereka Teoso ōkitikari iua, auapika inini ĩkapani. Iuara misākiretari Teoso ate ĩkapani. 35 Ininiā kipa atxiīti iotokakatari Kristo tirketiniua? !Auari, kotxi amaxikikosaaki, Kristo tirketapanikaua. Amauarenisaaki, Kristo tirketapanikaua. Amisiritikosaaki,

Kristo turetapanikaua. Natxi auakasaaki, Kristo turetapanikaua. Amamãkanisaaki, Kristo turetapanikaua. Monõkori auakasaaki, Kristo turetapanikaua. Neenamatchi auakasaaki, Kristo turetapanikaua. <sup>36</sup> Teoso sãkire iõkatsopatakori txari:

Pisãkire aãuikini xika, pamonõkoniri ikiniõtika. Aõkiko monõkoni auapika. Soti auõte apanakini okini atoko, apanakini nirekari okiniua ate,

itxa Teoso sãkire iõkatsopatakori. <sup>37</sup> Maerekati ikara atoko aua, iuaritika iteene akãiata, kotxi atiretakiri sikataparataua. <sup>38</sup> Ia nimarota.

Kristo turetiniua iotokakakari !auari. Apãkasaaki, ituretapanikaua. Aãuapanika inakasaaki, ituretapanikaua. Teoso nitiriakori iaxitikiñi !iotokakari ituretiniua. Satanasi nitiriakori !iotokakari ituretiniua. Ìkorsaaki auakani, katana auakani apaka !iotokakari Kristo turetiniua. ! Auari posotiiretxi, Kristo turetiniua iotokakakari.

<sup>39</sup> Iaxiti apiko nopinixiti auakani, iaxiti patapi auakani apaka, !iotokakari Kristo turetiniua. Hinitiniãri Teoso turetiniua iotokakakari, ! hãpokari. Hinitiniãri ikinika Teoso kamakiti auiniãtaã, iuaritika kona hãpokari Teoso turetiniua iotokakakari. ! Auari. Aãuõte Kristo Xesosi oerekaua Teoso iteene turetiniua.

## 9

### *Teoso Mereẽna Xoteoakori Inakitiakori Ìkapani*

<sup>1</sup> Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireẽ nimarotari nisãkire atão inini, kotxi Erekarì Matamatakoti



oerekari nisäkire atão inini. <sup>2</sup> Ia nisäkire atão. Iteene nimatinaniuatapika. Nākixinireē maerekaxiniretinoka nitxa, ninirimane Kristo sākire mauikakani xika. <sup>3</sup> Ninirekamari Teoso misiritinino nota, ninoa nitariakori imamisiritakani ĩkapani. Ninirekamari Kristo manirekakanino nota, ninirimane Kristo nakitiakori ininiuua ĩkapani. Niposotiniāri ikara atoko nikamini, nikamari ninirimane ĩkapani. Txamari !niposotari. <sup>4</sup> Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isāpiretana ninoa ikamaenetakiti ninoa ĩkapani. Isikari ipaniātakiti iōkatsopatakori ninoamoni. Oerekana ninoa kiiniri atão ikaminina, iuakata isākirauatakasaakina. Teoso sāpiretana ninoa ikamakiti tīkane ikinimane kākiti ĩkapani. <sup>5</sup> Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniākasaaki, ninoa apiko mekaniri itxaua, iuaritika Teoso itxaua. Ikinimane auīte itxaua. “Peerekai,” matxari iua ātipirika. Ameē.

<sup>6</sup> Atxiīti Teoso kona kamari ikamaenetakiti Isaeo apika mekaniriakori ĩkapani? Ikamapitkariko. Txamari kona ikinikani Isaeo apika mekaniriakori Teoso nakiti !itxauana. <sup>7</sup> Kona ikinikani Apraão apika mekaniriakori atão Teoso anaakori litxauana, kotxi Teoso txari Apraão:

Papika mekaniriakori atão inakani Isaki mekaniriakori itxauana.

<sup>8</sup> Teoso sāpiretari Isaki auini, iua auini apisapanika. !Isāpiretari āti Apraão ākiri Isimaeo inakori auini, iua auini apisapanika. Isimaeo iponaniā, kotxi Apraão sirīka Isimaeo inorokata.

Ininiã kãkiti Isimaéo atoko, Teoso anaakori ! itxauana. Teoso sãpiretari Apraão iua keene inini, ininiã isikaenetakininoka atão Apraão apika mekaniriakori itxauana. <sup>9</sup> Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keen-eroko. Kiki oenetako.

<sup>10</sup> Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. <sup>11-12</sup> Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereëri iua eereka iponaniãkari Xakoo inakori apiari inini ikapani, iua auini apisapanika. Ininiã na Xakoo kamakitini txĩkitakari Teoso mereiniri iua. Teoso mereëri iua, kotxi inirekari ikara atoko inini. <sup>13</sup> Teoso sãkire iõkatsopatakori txari:

Xakoo nitireta. Isao nomanata.

<sup>14</sup> Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. ãtipirika Teoso kamari erekari.

<sup>15</sup> Teoso txari Moisesi:

Ninirekiniãri ãti niamonĩkini, niamonĩkari.  
Ninirekiniãri ãti nimoianatini,  
nimoianatari.

<sup>16</sup> Ikara atoko ininiã, anireëkiti !itxĩkitakari Teoso mereinua. Akamakiti !itxĩkitakari Teoso mereinua. Imereëua, kotxi iamonĩkaua. <sup>17</sup> Teoso txari Paraoo isãkire iõkatsopatakoriã:

Nota txīkitakai auītetxi pininiua, niposotiire no-  
erekini īkapani, niuāka ikini itixiti auakani  
imarotini īkapani,  
itxa Teoso sākire iōkatsopatakori. <sup>18</sup> Ininiā Teoso  
nirekiniāri iamoniīkiniri āti, iua amoniīkari iua.  
Apaka inirekiniāri, itxīkitakari āti ākixinire kaikox-  
inire inini, Teoso nireēkiti imanirekakani tīkane.

*Teoso Omanākare, Iamoniīkare Pakini*

<sup>19</sup> Atxiīti hīte txano nota: “Teoso ikara atoko  
ininiā, na ate xikani kaikoxinireua ate. !Aposotari  
akaminiri Teoso manirekakiniti,” atxiīti hītxano.  
<sup>20</sup> Txamari !apakata ia atoko hinini. Kiriparai  
hīte ikara atoko ina sākiretakani Teosomoni?  
Kākiti hītxaua. Teoso kamakiti pitxaua. Atauako  
kamakori posotatari ikamakirimoni: “Kinirepa  
pikamano nota ia atoko ninini?” !Apakata ikara  
atoko hinini hīkamakirimoni. <sup>21</sup> Hīxinikari kiki tūtxi  
kamakari. Ikamari inireēkiti. Atxiīti āti porīi  
katsariā, ikamari ipi kopiti. Atxiīti ianaka ikamari  
āti kopiti, peereri inini, kiiniri īkapani. Atxiīti  
ātipekana ikama patimari poiāo ereri, ikiniōtika  
iāriā iātiko īkapani.

<sup>22</sup> Ikara atoko itxa Teoso kaminiri kākiti.  
Teoso kamari apanakini kākiti Teoso omanākare  
imarotinina īkapani imaerekanina xika. Iusaaki  
oerekana iposotiire imarotininina īkapani. Teoso  
omanatana ninoa, iuaritika imīteenekana. Kona  
uatxa ixipokana ninoa. Txamari iketo manapi  
ixipokanako ninoa. Uatxa imīteenekapanikari  
ninoa maerekani. <sup>23</sup> Apaka ikamari apanakini iua  
amoniīkakini. Uatxa imīteenekari iua omanatakini  
maerekani, kotxi inirekari iua amoniīkakini  
imarotininiri iua ereka inini, kotxi peerekari iua.

Iteene itiretari iamonĩkakini. Ikamana ninoa erekari isikakiti apakapinina ĩkapani. <sup>24</sup> Hĩte, ate pakini, iua amonĩkakini atxaua. Iua akiritakini atxaua. Na Xoteonanini akirita. Akiritana Xoteo minakaniuua apaka. <sup>25</sup> Teoso sãkire iõkatsopatakori, Oséia iõkatsopatakitiã, Teoso sãpiretari ikara. Itxari: Kãkiti mitxi nota nakitiakori minakonimoni nitxako: “Uatxa nota nakitiakori hĩtxapekauako.” Ninoa mitxi nimatiretakinitimoni nitxako: “Uatxa nota tirketakini hĩtxapekauako,” nitxako.

<sup>26</sup> Mitxi Teoso txana ninoa: “Na nota nakitiakorini ! hĩtxaua.” Ikara Teoso sãkiretiniãtaã, iuaãtaãtxikana: “Teoso ãtipirika auãki inakari anaakori hĩtxaua,” inaãka ninoamoni, itxa Teoso sãkire iõkatsopatakori.

<sup>27</sup> Apaka Teoso sãkire iõkatsopatakoriã, Isaía txari: Isaeo apika mekaniriakori kaiãopokori, potxoari uiniti kipatxite atoko itxana, txamari poiãonoka makatxakaãka imapinakani ĩkapani.

<sup>28</sup> Patimari Teoso xipokiniri iparĩka imisiritiniri kãkiti imaerekani xika, itxa Isaía. <sup>29</sup> Mitxipeka Isaía txari:

Apiananiri kaposotiireri nĩkatari apanakini aãpika mekaniriakori imapinakani ĩkapani. Ininiã atenape auapanika. Teoso manĩkatakanimauako, axipokapiimako kãkiti Sotoma sitatxiti auakani xipokini atoko, kãkiti Komoha sitatxiti auakani xipokini atoko atxapiimako, itxa Isaía sãkire.

*Xoteo Mauikakaniri Teoso Sãkire*

<sup>30</sup> Ininiãkara aimarotari ia: Xoteo minakaniuua manitakanisaakiri Teoso txĩkitakinina atão inakari kamakani ininiuana, iuasaaki Teoso txĩkitakana atão inakari kamakani ininiuana, kotxi auikarina Teoso sãkire. <sup>31</sup> Txamari Xoteoakori nitaãpotari paniãtakori ninoa atão inakari kamakani txĩkitakakari, txamari ! apokarina. <sup>32</sup> Kinirepa ! apokarina ikara? Kinirepa Teoso na txĩkitakana ninoa atão inakari kamakani ininiuana? Kotxi ! auikarina isãkire. Inirekarina iparĩkana txĩkitakinina atão inakari kamakani ininiuana. !Inirekarina auikinirina Xesosi sãkire, Ninoamoni Xesosi kai kimapori nopini auakari atoko itxa, kotxi kai xika kãkiti mãkitita. <sup>33</sup> Teoso sãkire iõkatsopatakori kitxakapirĩkari sãpiretari ia kai pirena. Itxari:

Pikenakotariko ia: Nota iokanatakiti kãkitimoni kai atoko itxa. Nitakari iua kai Sião sitatx-itiã Xoteoakori kimaporeẽ. Iua kai xika kãkiti mãkitita. Iua kai xika kãkiti irika. Iuaritika iua sãkire auiãkani !ipẽtauata nota apisatoõ.

## 10

<sup>1</sup> Nitariakori, nãkixinireẽ iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimisãkiretari Teoso ninoa maerekani makatxakiko ĩkapani. <sup>2</sup> Nimarotari ninirimane iteene nirekiniri iparĩkauatini Teoso ĩkapani. Txamari ninoa kerokari, kotxi ! imarotarina atão iparĩkauatini Teoso ĩkapani. <sup>3</sup> !Imarotarina Teoso txĩkitakiniri kãkiti atão inakari ikamini. Ninoaka nirekamari atão inakari ikaminina, Teoso apakapinina ĩkapani. Ininiã ! auiritarina Teoso txĩkitakinina

ninoa atão inakari ikaminina. <sup>4</sup> Kristo kamari ikinipoko Teoso paniãtakiti iõkatsopatakori iaõka, ininiã iuanoka txĩkitakari ikinimane kãkiti iua sãkire auiãkani atão inakari ikaminina.

### *Apiananiri Akiritakani*

<sup>5</sup> Kitxakapirĩka Moisesi sãpiretari atão inakari akamini Teoso paniãtakiti. Iuasaaki itxari:

Ikinika Teoso paniãtakiti iõkatsopatakori ikiniõtika pikaminiã, pauapininiika pitxako,

itxa Moisesi sãkire. <sup>6</sup> Txamari !aposotari ikara

atoko akamini. Aãuikasaakiri Xesosi sãkire, iua

txĩkitakaua atão inakari akamini. Ininiãkara !

apakata pãkixinireẽ pixinikiniri: “Kipa atxiĩti

posotari iaxiti apiko nopinixitimoni isini,

Kristo notamoni iminini ãkapani?” <sup>7</sup> !Apakata

pãkixinireẽ pixinikiniri: “Kipa atxiĩti posotari

ipĩkani auiniãtaã isini, Kristo notamoni iminini

ãkapani?” <sup>8</sup> Xesosi sãkire auape hĩtemoni.

Na hĩsa ãtiãtaã iua sãkire himarotini ãkapani.

Hinamaãpekari. Hãkixinireẽpekari. Xesosi

sãkire auikiko asãpiretapikari kãkiti. Ia atoko

asãpiretari kãkiti: <sup>9</sup> Pinamaã, “Xesosi niauĩte”

pininiã, pãkixinireẽ pauikiniãri Xesosi ipinini

Teoso õkitikiniri iua, iuasaaki pimaerekani

makatxakaãkako. <sup>10</sup> Kotxi aãkixinireẽ Xesosi sãkire

aãuikiniã, ikamaerekataua. Anamaã “Maerekati

kamakarino nota,” aniniã, iua makatxakari

amaerekani. <sup>11</sup> Teoso sãkire iõkatsopatakori txari:

Iua sãkire auiãkari pẽtauatini !auari.

<sup>12</sup> Iua Kristo sãkire auiãkari atxiĩti Xoteo itxaua.

Atxiĩti Xoteo minakatiua itxaua. Xoteo auĩte itx-

aua Kristo. Xoteo minakaniua auĩte apaka itx-

aua. Ikinimane auĩte itxaua Kristo Apiananiri.

Isikari itanapoko erekari ikinimane iua akiritakanimoni. <sup>13</sup> Teoso sākire iōkatsopatakori txari:

Ikinimane akiritiniāri Apiananiri uāka imaerekanina imakatzakini ĩkapani, iuasaaki imakatzakaākako imaerekanina.

<sup>14</sup> Kiātokopa itxa ninoa akiritiniri iua, isākire imauikakanisaaki? Kiātokopa itxa ninoa auikiniri isākire, imakenakotakanisaakirina? Kiātokopa itxa ninoa kenakotiniri isākire, imasāpiretakonisaakina? <sup>15</sup> Kiātokopa itxa Teoso iokanapirena sāpiretiko, ate maiokanatakaniāri iua sākire sāpiretakani kākitimoni? Teoso sākire iōkatsopatakori txari:

Erekapitikari Teoso iokanapirena erekari sāpiretakani apokini kākitimoni, kotxi isāpiretarina Teoso kamaerekaxiniretiniri kākiti. Isāpiretarina erekari Teoso sikakiti kākitimoni. Ikara iminapiretakitina kamapoxokonitari kākiti.

<sup>16</sup> Txamari na ikinimane kākitini auikari Teoso iokanapirena erekari. Kotxi kitxakapirīka Isaía txari:

Apiananiri, asāpiretamari piokanapirena kākitimoni, txamari !auikarina, itxa Isaía. <sup>17</sup> Kākiti kenakotakasaakiri Teoso iokanapirena, Teoso txīkitakari kākiti auikiniri isākire. Kristo sākire akenakotakasaaki, akenakotari Teoso iokanapirena.

<sup>18</sup> Txamari nota pimaāi: “Atauako Xoteo kona kenakotari Teoso iokanapirena?” Ikenakotapitikarina, kotxi Teoso sākire iōkatsopatakori txari: Iaxiti apiko nopinixiti auakari oerekari Teoso ikini itixiti auakani. Teoso sākire atoko itxa iaxiti apiko nopinixiti auakari oerekakiti.

19 Iuaĩkana nipimaãi: “Atauako Xoteo !imarotari Teoso iokanapirena?” Imarotapitikarina. Moisesi sãpiretapekari Teoso sãkire. Itxari:

Nimakatxakari Xoteo minakaniua maerekani, ininiã nitxĩkitakaiko hĩte hĩxikotinina ninoa mitxi nota nakitiakori minakaniua. Nitxĩkitakai hĩte homanãkarauatini, ninoa mitxi mimaroreni xika.

20 Isalapekana sãpiretari Xoteo minakaniua pirena. Isãpiretari Teoso sãkire itaparaxinireritika:

Teoso txari: “Ninoa nota manitakani aõkitano nota. Nimotika nota makiritakanimoni.”

21 Apikomoni isãpiretari Teoso sãkire Xoteo kamak-iti:

Teoso txari: “Ikiniõtika namanaãri ninoa kanapiriini notamoni, txamari !ikĩpitarina nisãkire. !Ikamarina nisãkire iaõka. Inireẽkitinoka ikamana.”

## 11

### *Xoteo, Teoso Sãkire Auiãkani*

<sup>1</sup> Ininiã nipimaãi: “Atauako Teoso !inirekaikari Xoteoakori?” Inirekapitikana. Nota apaka Xoteo nitxaua. Apraõo apika mekaniri nitxaua. Pẽxamiĩ apika mekaniri nitxaua. <sup>2</sup> Teoso !itapanari Xoteoakori. Iua mereẽna ninoa itixi kamiko apisapanika. Himarotari Teoso sãkire iõkatsopatakori, Eríasi tsoatakasaaki Teosomoni Xoteo maerekani isãpiretakasaaki. <sup>3</sup> Iusaaki Eríasi txari:

Apiananiri, ninoa okapekari kãkiti pisãkire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisãkire sãpiretakarino auapanika. Ninoa asikatikinitano nota okinino ĩkapani,



itxa Eríasi. <sup>4</sup> Kanatokopa Teoso apakapapiretari Eríasi? Teoso txari:

Kona pitenanini auikari nisãkire. Nota nĩkatarì setxi mio kikiakori nota nakitiakori. Ninoa kona teosonetari kãkiti kamakiti Pao inakori. Kona ikapotoreẽkauana iua apisatoõ, Teoso txari Eríasi. <sup>5</sup> Ikara atokotxikana uatxa. Aua apanakini kãkiti Teoso mereẽkini. Imereẽna ninoa, kotxi iua nirekari ikinipoko erekari ikaminina ninoa. <sup>6</sup> Maerekati kamakani kãkiti, iuaritika Teoso mereẽua ate. Isikari ikinipoko erekari ate ìkapani maxikatĩka. Aparĩka !itxĩkitakari iua sikiniri ikinipoko erekari atemoni. Aparĩka txĩkitakiniãri ikinipoko erekari isikiniua, ininiã kona maxikatĩka isikarauata atemoni.

<sup>7</sup> Ininiã kanatokopa atxa asãkire apikomoni? Xoteoakori kona apakapari inireẽkitina. Inirekarina Teoso apakapinina ninoa erekarini ininiana. Teoso mereẽkininoka apakapari ikara inakari. Apanakinipekana Teoso !aurita atão imarotinina. Mõsiãreni atoko itxana. <sup>8</sup> Teoso sãkire iõkatsopatakori txari:

Teoso txĩkitakari ninoa ãkixinire imakakari atoko inini, iua sãkire imimarotakanina ìkapani. Kokipitikamana, iuaritika !atamatarina Teoso kimapore. Kakenakokipitikamana, iuaritika ! inirekarina Teoso sãkire ikĩpitinina. Uatxapiima ikara atoko itxapanika,

itxa Teoso sãkire iõkatsopatakori. <sup>9</sup> Kitxakapirĩka Tavii txari Teosomoni:

Ninoa kiena kaiãopokori. Inipokotakasaakina, iuãkatarina pite apokaerekatina ninoa, kotxi kaiãopokori ikienana. Ikienana

takapiri atoko itxa imaĩkinina ninoa. Itxĩkitakana ikerokinina. Ikara xika ninirekari pimisiritinina.

<sup>10</sup> Ninirekari ninoa mōsiāreni atoko ininiuana, ininiā na atāo atamatarina pikimapore. Kākiti tiitxi minari porikitakani atoko pitxĩkitakanako ninoa ātipirika, itxa Tavii sākire.

### *Xoteo Minakaniuua Maerekani Makatxakiko*

<sup>11</sup> Iuaĩkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiākara Teoso sāpiretari Xoteo minakaniuua imaerekanina imakatxakini, Xoteo xikotinina ĩkapani, iuaĩkana Teosomoni ikanapiriinina ĩkapani. <sup>12</sup> Xoteoakori kamari maerekati, ininiākara Teoso sikari erekari kiĩkiri apanakini itixi auakanimoni. Xoteo mapakapakiniti Xoteo minakaniuua apakapa erekari kiĩkiri. Ininiā Xoteo kanapiriākasaaki Teosomoni, iusaaki apiaerekata Teoso sikakiti kākitimoni.

<sup>13</sup> Uatxa nota misākiretai hĩte Xoteo minakaniuua, kotxi Teoso iokanatanano nota hĩtemoni isākire nisāpiretini ĩkapani. Niuikari hĩtemoni niokanatiko.

<sup>14</sup> Ikara atoko ininiā, atxiĩti ninirimane Xoteo xikotai hĩte, ininiā atxiĩti apanakini ninoa kanapiriā Teosomoni, imaerekanina Teoso makatxakini ĩkapani. <sup>15</sup> Teoso takanapakasaakiri Xoteo, iua apakapari Xoteo minakaniuua, ininiā ninoa Xoteo minakaniuua kanapiriā Teosomoni. Teoso iuaĩkana apakapakasaakiri Xoteoakori, iusaakiko peerekari. Ipĩkani iuaĩkana auāki inini atoko itxako.

16 Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. 17 Xoteoakori oriva mina takakori atoko itxa, takakori Teoso nakiti. Ātikaka ipori kapatakaãka. Oriva ĩtopakiri pori apaãka. Iapitaka inaãka ikapatakikoãtaã. Aneẽ takari katiã. Takari sikakienatari ĩtopakiri pori. Hĭte Xoteo minakaniua iua oriva ĩtopakiri pori atoko hĭtxaua. Hãpakapari Teoso sikakiti, kotxi hĭte apotiitaua Xoteoakorikata, Teoso nakitiakorikata. 18 Hĭte Xoteo minakaniua, kona hĭuikapeua Teoso apakapinii hĭte. “Iua aãpori kapatakiko atoko, Teoso takanapana Xoteoakori, ate apakapini ĩkapani,” kona hĭtxape, kotxi aãpori atoko hĭtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hĭte apakapari Teoso sikakiti, kotxi hãpotiitaua Xoteokata.

19 Atxiĭti hĭte Xoteo minakaniua txano nota: “Iua aãpori kapatakaãkori atoko Teoso takanapari Xoteoakori. Āti aãpori iapitakiko atoko, Teoso apakapaua ate,” hĭtxano atxiĭti. 20 Atãopitikara. Teoso takanapari Xoteoakori, kotxi ninoa !auikari isãkire. Iua apakapai hĭte, kotxi hĭte auikari iua sãkire. Iuaritika !hĭuikapeua ikara atoko hinakasaaki. Erepaniko. 21 Teoso takanapari Xoteoakori, takari pori sauakakori atoko. Ininiã erepaniko, kotxi ĩtopakiri aãpori atoko hĭtxaua. Atxiĭti āti ōti okanapai hĭte apaka.

22 Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki.

Itiraõki himanirekakaniã, hĩte apaka mapara hõkaãka, iua aãpori sauakakori atokokana. <sup>23</sup> Xoteo takanapiniãri imauikakaniri Xesosi sãkire, auikiniãri iuaĩkana isãkire, Teoso iuaĩkana mikanapiriãna, kotxi Teoso kaposotiireri ikara atoko ikamini. <sup>24</sup> Hĩte ĩtopakiri pori sauakakori takarimoni iapitaãkora atoko hĩtxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaĩkana Teoso takinina ninoa, iuaĩkana imikanapiriinina ninoa iuamoni.

*Xoteo Maerekani Makatxakaãkapanikako*

<sup>25</sup> Nitariakori ninirekari himarotiniri apanakini mimarotakiniti, ininiã na hũukaua. Xoteo !inirekari auikiniri Teoso sãkire uatxa, iuaritika na ikara atoko !itxapani ãtipirika. Ikinĩ itixiti auakani Teoso nireẽkini Xoteo minakaniua kanapiriãkasaaki Teosomoni, iusaakiko Xoteo kanapiriãko Teosomoni. <sup>26</sup> Ininiã iusaaki ikinimane Xoteo kanapiriãko Teosomoni. Iusaaki Teoso makatxakari ninoa maerekani. Teoso sãkire iõkatsopatakori kitxakapirĩka auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireẽkitinoka inirekanako.

<sup>27</sup> Nimakatxakariko maerekati ninoa kamakiti, kotxi kitxakapirĩka nikamaenetari ikara atoko inakari,

itxa Teoso sãkire iõkatsopatakori.

<sup>28</sup> Xoteoakori !inirekari Teoso iokanapirena erekari, ininiã Teoso takanapana ninoa. Ininiã

Teoso iokanapirena erekari sãpiretaãka hïte Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereëna ninoa. Apraão, Isaki, Xakoo pakini apika mekaniriakori itxauana, ininiãkara Teoso tiretapanikana ninoa. <sup>29</sup> Teoso kona mamakari isãkire. Kãkiti iua mereëkini ãtipirika iua mereëkini itxauana. Isiãkiti erekari kãkitimoni !imakatxaka iuaïkana. <sup>30</sup> Hïte Xoteo minakaniua kitxakapirïka ! hïkïpitari Teoso sãkire, iuaritika uatxa Teoso amonïkai hïte, kotxi Xoteo kona kïpitari Teoso sãkire uatxa. <sup>31</sup> Uatxa Xoteoakori kona kïpitari Teoso sãkire. Teoso amonïkapekai hïte Xoteo minakaniua, ininiã Teoso iuaïkana amonïkanako Xoteoakori apaka. <sup>32</sup> Ikinimane kãkiti na kïpitari Teoso sãkire. Kona aposotari akïpitiniri Teoso sãkire. Teoso txïkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonïkaua.

### *Peerekari Teoso*

<sup>33</sup> Peerekari Teoso. Atãonoka ikama. Paimatireri iua. Kãkiti !imarotari ikamakiti tïkane. Kãkiti !imarotari inireëkiti tïkane. <sup>34</sup> !Kimarotikori Teoso xinikakiti. !Kõtãkikikori Teoso. <sup>35</sup> Teosomoni ikinipoko aua, ininiã kipa asika atxïiti iuamoni? Asikiniri !auari. Ininiã !auari ate nakiti, iuaïkana Teoso sikiniua ïkapani. <sup>36</sup> Kotxi Teosokara kamari ikinipoko. Ikinipoko aua Teoso posotiireë. Ika-mari ikinipoko iua ïkapani. ãtipirika matxariko Teoso: “Peerekai pite.” Ameë.

## 12

### *Teosomoni Sikakori Auãkiri*

1 Ininiã nitariakori Teoso amonĩkapitikaua. Ininiã nota iteene õtãkikai hĩte. Hĩteka hĩsikaua Teosomoni. Teosomoni sikakori auãkiri atoko hĩtxauako. Ininiã iua nakitinoka hĩtxaua. Ikara atoko hĩkaminiã, Teoso apokaerekatari. Ikara atoko inakari akaminari Teoso, ikara atão. 2 ! Hĩkamapinikariko Teoso sãkire mauĩãkani kamakiti atoko. Hãuiritariko Teoso txĩkitakiniri hĩxiniãkiti ereka inini, ininiãkara ipinipo hĩtxako. Iuusaakiko himarotari Teoso nireẽkiti. Himarotari Teoso nireẽkiti ereka inini. Himarotari hĩkamakiti tĩkane iua apokaerekatini. Himarotari atão hĩkamini.

3 Teoso sikari ikinipoko erekari notamoni, ininiã nisãpiretari iua sãkire hĩtemoni. Ininiã nota õtãkikai hĩte hĩkinika. Na hũikapeua. Hĩteka atão himarotauako. Hĩteka hãtamakauako. Teoso txĩkitakai hãuikiniri isãkire. Itene hãuikiniãri iua sãkire, itene hĩteka himarotaua. 4 Kãkiti ãto ãtika, iuaritika ãtotxiã auakari kaiãopokori. Aua ikanoke, itapike, oki, ikenakoki txaãpota. Ikinika iparĩka aua. Ikanoke parĩka ãtião. Oki parĩka ãtião. Itxaãpota. 5 Iua atokokana atxa. ãtotxi ãtika atoko atxa, iuaritika itoua ate. Kanoketxi, tapiketxi, okĩtxi, kenakokitxi, ãtotxiã auakari atoko ate. Kristokata aãpotiitaua. Anakititakakaua. 6 Nota parĩka Teoso ãkapani ãtião. ãti parĩka Teoso ãkapani ãtião. ãti parĩka Teoso ãkapani ãtião, itxaãpota. Teoso sikari erekari ikininapemoni, ikara iparĩka ikamini ãkapani. Atxiĩti Teoso sikaimaroretai iua sãkire apanakinimoni pisãpiretini ãkapani, ininiãkara Teoso sãkire pauikini iaõka pisãpiretari Teoso sãkire kãkitimoni. 7 Teoso sikaimaroretiniã iapanakini pimiparĩkatini, ininiã pimiparĩkatariko apanakini. Teoso sikaimaroretiniã isãkire

poerekini, ininiã poerekarauatako. <sup>8</sup> Teoso sikaimaroretiniã ãti pisikataparaxiniretini, ininiã pisikataparaxiniretariko ãti. Teoso nirekiniãri pisikiniri apanakini amonitakiti ninoamoni, ininiã ito pisikako pipoxokoniritika. Teoso sikaimaroretiniã auĩtetxi pininiua, ininiã auĩtetxi erekari pitxauako. Teoso nirekiniãri apanakini piamonĩkini, ininiã pipoxokoniritika piamonĩkanako.

### *Tiraõkitxi*

<sup>9</sup> Atão pitiretariko apanakini pãkixinireẽ. Pomanatariko maerekanitxi. Na piotokakapiri erekari pikamini. <sup>10</sup> Iteene hĩtiretakauako, kotxi Kristo txĩkitakapekua aĩtaritakakiniua. Piteka pipaxitiniua atokokana, apiata pipaxitariko ãti. <sup>11</sup> Pitaparaxinireritika piparĩkauatako. Na piarinouatapẽ. Piparĩkauatako Teoso ĩkapani pipoxokoniritika pãkixinireẽ. <sup>12</sup> Pipoxokoniuatako, kotxi pimarotari Teoso kaminiri ikamaenetakiti. Pimĩteenekariko pimisiritiko. Ātipirika pimisãkiretariko Teoso. <sup>13</sup> Nipokori kaamatiniã pitariakorimoni, tiitxi kaamatiniã pitariakorimoni, auiniã pitemoni, pisikanako. Papakapanako pipoxokoniritika ĩkinimane Xesosĩ sãkire auĩãkani paapoko apoãkani, ãtiãtaã ĩkani.

<sup>14</sup> Pamanaãri Teoso erekari ikaminina pite misiritakani. Ari, pamanaãri Teoso erekari ikaminina ninoa. Na pamanaãpiri Teoso maerekati isikinina ninoa. <sup>15</sup> Pipoxokoniuatako poxokorinikata. Pitxiapata kamatinaniririkata. <sup>16</sup> Āti pitiretini atokotxikana, ĩkinimane

pitiretako. Na piuikapeua. Pisākirauatako kākiti matxineirotenikata, katxineiroteni pimisākiretini atokotxikana. “Kimaroreno nota,” na pitxape.

<sup>17</sup> Kākiti kaminiāri maerekati pitemoni, na pikamapiri maerekati iuamoni. Atāonoka pikama ikinimane ikapani. <sup>18</sup> Pinirekariko pauini kākiti sauaki ereka inini, ininiā maxikatiika kona pitxitapiri āti. <sup>19</sup> Nitiretakini, na hīxikatxitapiri āti. Teosora xikatxitariko, kotxi Teoso sākire iōkatsopatakori txari:

Nota parīka āti nixikatxitini. Notara misiritari maerekati kamakari, itxa Apiananiri sākire. <sup>20</sup> Ari, kona pixikatxitapiri āti. Pikamariko ātimoni ia Teoso sākire iōkatsopatakori iaōka:

Pomanatakiri natxitiniā, pisikakienatari iua. Iposonatinia, pisikari iātini. Ikara atoko pikaminiā, ipētauata maerekati pitemoni ikamini,

itxa Teoso sākire iōkatsopatakori. <sup>21</sup> Na pauiritapiri maerekati piauīte atoko ininiuana. Erekari pikamakasaaki, maerekati iokanatapeēkaika.

## 13

### *Aāuīteakori Nirekakiti Akīpitini*

<sup>1</sup> Akīpitariko aāuīteakori nirekakiti, kotxi Teosora auiritana ninoa auītetxiakori ininiuana. Teosora takari ninoa auītetxiakori aāuīteakori ininiuana ikapani. <sup>2</sup> Aāuīteakori nirekakiti amakamakaniā, Teoso nirekakiti apaka ! akama, kotxi Teoso txīkitakana ninoa aāuīteakori ininiuana. Ninoa paniātakiti amakamakaniā, amisiritaākako. <sup>3</sup> Erekari kamakani ! ipīkari



iauūtena. Maerekati kamakaninani pīkana ninoa. Pinirekatari pimapīkakaniri piauūte? Ininiā erekari pikamako, ininiā iua txaiko: “Erekai pite.”<sup>4</sup> Teoso nitiri itxaua piauūte, erekari pitemoni ikamini īkapani. Txamari maerekati pikaminiā, erepaniko. Pipīkariko iua, kotxi iposotari imisiritinii. Iua Teoso nitiri itxaua kākiti maerekati kamakani imisiritini īkapani.<sup>5</sup> Ininiākara pikamariko piauūteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pākixinireē ikara atoko atāo pikamini.

<sup>6</sup> Piauūteakori Teoso nitiriakori itxauana, ininiā erekari apaka pisikiniri txineiro ninoamoni iparīkana ikaminina īkapani.<sup>7</sup> Ininiākara pīīkitxitana ninoa amanaākiti, sitatxi pauini īkapani, pitii papakapini īkapani. Pipaxitanako ninoa. Pikamariko ninoa nirekakiti.

### *Hītiretakiniua Īkapani*

<sup>8</sup> Pīīkitxitariko ikinika piamotakiti. !Erekari pimaīkitxitakaniri āti. Ātinoka tēpito erekari. Ia tēpito na txineironi. Ia tēpito atiraōki. Ia atoko inakari tēpito xipokini kona erekari. Ātipirika hītiretakakauako. !Erekari pixipokiniri pitiretiniri āti. Āti tiretakari kīpitapekari Teoso paniātakiti iōkatsopatakori.<sup>9</sup> Teoso paniātakiti iōkatsopatakori txari: “!Pisirīkape pītanoro minakotokatika. Na pokaniuatape. Na pīitiriuatape. Na pinirekapiri apanakini tii.” Akīpitari ikara Teoso paniātakiti iōkatsopatakori, apanakini ipaniātakiti apaka, ia Teoso paniātakiti ātika akīpitiniā. Ia Teoso

paniãtakiti paniãtaua: “Piteka pitiretiniua atokotxikana, pitiretariko ãti.” <sup>10</sup> Pitiretiniãri ãti, maerekati !pikaminiri iua. Ininiã ãti pitiretiniã, pikamari Teoso paniãtakiti iõkatsopatakori ikinika.

<sup>11</sup> Matiretari ãti, kotxi aimarotari kaiamapekari Kristo kanapiriini. Ininiã pimerekako. Kona pimakapeko. Piparĩkauatako Teoso ĩkapani, kotxi itixine Xesosi anikiniua õti apokaãpotanapanoka. Akokaxiti aũukari Xesosi sãkire. Uatxa paĩtiki ikanapiriã. <sup>12</sup> ĩkanõkari xipokaãpotanapanoka. Pokamara apokaãpotanapanoka Kristo kanapiriãkasaaki. Maerekati ipiãkasaaki kamakori atoko itxa, ininiã maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiã maerekati !imaĩkaua. Pokamarari atoko itxa erekari akamakiti. <sup>13</sup> Pokamara kãkiti kamari atão inakarınoka apanakini apisatoõ. Makamari ikara atoko inakari ãtipirika. !Erekari kiiniri maerekati akamini. !Erekari apoãtini. !Erekari asirĩkini sito aĩtanoro minakotokatika. !Erekari akaminiri maerekati aĩto nireẽkiti. !Erekari aneenamauatini. !Erekari axikotiniri ãti. <sup>14</sup> Ikara atoko inakari akamini !erekari. Makamari ia atoko inakari: Maamanaãri Apiananiri Xesosi Kristo kapakiniua, sotato mãka paikori sotato ĩto kapakini atoko. !Hĩxinikapiri: “Kanatokopa nitxa nıkaminiri niĩto nireẽkiti?” Kotxi maerekatinoka aĩto nireẽkiti.

## 14

### *Kona Hĩtaparakienatakapeua*

<sup>1</sup> Hãuiritariko Xesosi sãkire poiãonoka auiãkari hĩtekata apotiitiniua. Na hĩtxitapiri iua, ixinikakiti

na hīte xinikakiti atoko iminakanisaaki. <sup>2</sup> Kākiti iteene auikiniāri Xesosi sākire, atxiīti inikari itanapoko nipokori. Āti kākiti poiāonoka auikiniāri Xesosi sākire, atxiīti inikari takarinoka. <sup>3</sup> ! Erekarī ikinipoko niākari sāpiretiniri takarinoka niākarimoni: “Pikerokari” ininiri. Apaka ! erekarī takarinoka niākari sāpiretiniri ikinipoko niākarimoni: “Pikerokari” ininiri, kotxi Teoso apakapapekari iua. <sup>4</sup> Kinakariparai pite āti nitiri pinitakarii: “Pikerokari” ātimoni inakarii. Ikerokiniāri, iua patrāote pinitamariko. Maerekati ! ikama, kotxi Apiananiri moianatari iua.

<sup>5</sup> Atxiīti āti sākire: “Ia ōti erekarī iteene axinikiniri Teoso.” Atxiīti ātipekana: “Ikinioṭika erekarī iteene axinikiniri Teoso.” Hāxixinireē hīxinikariko: “Natokopa itxa atāo nikamini?” ininiā eereka atāo hīkamini tīkane himarotape. <sup>6</sup> Hīte: “Ia ōti apiaerekata iteene axinikiniri Teoso,” hininiā, ininiā ikara atoko hīxinika Teoso hīpaxitini īkapani, ininiā erekapitikari. Ikinipoko niākari nikari ikinipoko, Teoso ipaxitini īkapani, kotxi apisapanika itxari Teoso: “Erekapitikai ia nipokori pisikinino niniākiti īkapani,” itxari. Ikinipoko maniākati apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitikai ia kienatxi pisikinino niniākiti īkapani,” itxari. Ininiā iua apaka paxitari Apiananiri. <sup>7</sup> Kona ateka auītetaua. Kona aāua ateka īkapaninanini. Kona apina ateka īkapaninanini. <sup>8</sup> Auapanika anakasaaki, aparīkauata Apiananiri īkapani. Apīkasaaki, apina Apiananiri īkapani. Ininiā auapanika anakasaaki, apīkasaaki apaka,

Apiananiri nakiti atxaua. <sup>9</sup> Kristo ipina, eereka òkitikaua iuaĩkana, auapanika inakani auĩte ininiua ĩkapani, ipĩkani auĩte apaka ininiua ĩkapani. <sup>10</sup> Ininiã ! apakata pitxitiniri pitari. “! Kĩĩkitei,” kona pitxapiri, kotxi akinika aãpokako Teoso apisatoõ. Iuasaaki iua sãpiretariko akamakiti, erekari inini atxiĩti, maerekati inini atxiĩti. <sup>11</sup> Teoso sãkire iõkatsopatakoriti txari:

Nota Apiananiri, ãtipirika auakari nitxaua. Ikini-  
mane kãkiti kapotoreẽkauako nota apisatoõ.

Ikinimane txanoko nota Teoso nininiua.

<sup>12</sup> Ininiã iuasaakiikarako akinika asãpiretari Teoso ikinika akamakiti ĩkorapokoriti aãuakasaaki.

### *Masikataparaxiniretakakaua*

<sup>13</sup> Ininiã hĩotokakariko hĩtaparakenatakakiniua. Hãkixinireẽ hĩtxako: “! Nitxĩkitakapaniri nitari kerokiniri ikamakiti. ! Nitxĩkitakapaniriko nitari kaminiri maerekati,” hĩtxako. <sup>14</sup> Xesosi Apiananiri nakiti nitxaua, ininiãkara nimarotari, apakatapitika Teoso sãkire auĩãkari nikiniri ikinipoko nipokori, kotxi nipokori maerekati ! auari. Iuaritika kãkiti auikiniãri iua nipokori maerekati inini, !apakata inikiniri. <sup>15</sup> Hinikiniãri ikinipoko nipokori, atxiĩti hĩtari ãkixinire maxirauata, ininiã na atão hĩtaretari iua. Kristo ipina iua hĩtari ĩkapani, ininiã hĩtakanapariko iua nipokori hinikini, kotxi atxiĩti iua ! auikaikari Xesosi sãkire, iua nipokori hinikini xika. <sup>16</sup> Erekari auakasaaki, !hãuiritapiri ãti sãpiretinii ikara erekari maerekati inini. <sup>17</sup> Teoso aãũte ininiãua, kona nipokorinanini, kona iãtakorinanini, axinika. Teoso aãũte ininiãua, axinikari Erekari Matamatakoti sikakiti atemoni. Iua txĩkitakaua

atãonoka akamini. Ikamaerekaxiniretaua. Isikapoxokonitaua. Teoso aãuïte ininiãua, ikara atoko itxa aãuini. <sup>18</sup> Ikara atoko aparĩkauatiniã Kristo ïkapani, Teoso apokaerekataua. Kãkiti apaka apokaerekataua.

<sup>19</sup> Ininiãkara manirekari kãkiti auini ereka inini, neenamatchi mauakani ïkapani. Masikataparaxiniretakakaua. <sup>20</sup> Na himisiritapiri Teoso parĩka nipokori xika. Ikinipoko nipokori erekari hinikini, txamari hĩte nikakiti txĩkitakiniãri ãti takanapiniri Kristo, hĩkerokari. <sup>21</sup> Hĩtari kerokiniãri ikamakiti hĩte niãkiti xika, apiaerekata himanikakaniri iua nipokori. Hĩtari kerokiniãri ikamakiti hĩte iãtakiti xika, apiaerekata iua iãriã himiãtakani. Na xatiki hĩtxĩkitakapiri hĩtari kaminiri maerekati. <sup>22</sup> Hĩtemoni ïkinipoko nipokori nikiko erekari, txamari na hĩsãpiretapiri apanakini. Erekari Teosonoka imarotiniri. Hĩxinikasaakiri hĩkamakiti atão inini, hãkixinireẽ himarotakasaakiri hĩkamakiti atão inini, iusaaki hĩpoxokoniuata. Ininiã kona hĩteka apoïtaua. <sup>23</sup> Hinikasaakiri nipokori, hãkixinireẽ: “Erekari atxiïti ia nipokori ninikini?” hinakasaaki, iusaaki Teoso txai: “Maerekati pikama,” kotxi kona pauikari pikaminiri erekari. Himauikakaniãri hĩkamakiti ereka inini, ininiã maerekati itxaua hĩkamakiti.

## 15

### *Ãti Nireẽkiti Kamiko Pirena*

<sup>1</sup> Atxiïti ïkinipoko Teoso sãkire aãuika, ininiã amoianatariko Teoso sãkire poiãonoka auiãkari, imaposotakiniti ikamini ïkapani. !Erekari ateka

nireëkitinoka akamini. <sup>2</sup> Erekari akaminiri aĩtari nireëkiti, iua amoiatatini ĩkapani, Teoso sãkire iteene auikini ĩkapani. <sup>3</sup> Kristo apaka !ikamari iuaka nireëkiti. Iua kamari Teoso nireëkiti, kotxi Teoso sãkire iõkatsopatakoriã Kristo txari iri:

Kãkiti misãkirepiretakasaakii pite, notara ninoa misãkirepireta.

<sup>4</sup> Ikinika Teoso sãkire iõkatsopatakori iõkatsopataãka ate oerekiko ĩkapani. Teoso sãkire iõkatsopatakori aãuikasaaki, aiãtapari apoxokoniritika erekari apokini. Aimarotari erekari apokapitikako. Teoso sãkire iõkatsopatakori sikataparaxiniretaua.

<sup>5</sup> Teoso sikataparataua, ininiã apoxokoniritika aiãtapari erekari apokini. Isikataparaxiniretaua. Ninirekari Teoso txĩkitakiniri hĩte nireëkiti ãtinoka inini, Kristo Xesosi nireëkiti iaõka hĩkamini. <sup>6</sup> Erekari hinireëkiti hãkixinireẽ ãtinoka inini. Erekari hĩsãkire ãtinoka inini. Ikara atoko hininiã, hĩkinika txari Teoso: “Peerekai pite,” kotxi iua aãũte Xesosi Kristo iri itxaua.

### *Xoteo Minakaniu Poxokoniuatini*

<sup>7</sup> Hãpakapariko ãti, Kristo apakapinii atokokana, ininiã kãkiti txari Teoso: “Peerekai pite,” txariko.

<sup>8</sup> Nisãpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraãomoni, Isakimoni, Xakoo pakinimoni, isikaenetakiti apokapeka Xesosi ĩkorapokoriti apokasaaki.

<sup>9</sup> Kristo Xoteoakori nitiri atoko itxapekaua, ininiã Xoteo minakaniu txari: “Kaamonĩkareri Teoso. Peerekari iua,” itxana. Teoso sãkire iõkatsopatakori txari:

Xoteo minakaniua auiniãtaã nitxariko Teoso: “Peerekai pite.” Nixikarauata pite ïkapani, kotxi peerekai pite.

<sup>10</sup> Iuaïkana Teoso sãkire iõkatsopatakori txari:

Hïte Xoteo minakaniua hïpoxokoniuatoko Xoteoakorikata, Teoso nakitiakorikata.

<sup>11</sup> Iuaïkana Teoso sãkire iõkatsopatakori txari:

Hïte hïkinika Xoteo minakaniua, “Peerekari Api-ananiri” hïtxako. Hïkinika itixi auakanii hïxikarauatako Teoso ïkapani.

<sup>12</sup> Iuaïkana Teoso sãkire iõkatsopatakoriã Isaía txari:

Auako Xesee apika mekaniri. Xoteo minakaniua auïte itxauako. Ninoa imarotariko isãkire iaõka ikamini,

itxa Teoso sãkire iõkatsopatakori.

<sup>13</sup> Teosora txïkitakai himarotiniiri isãkire iaõka ikamini. Ninirekari iua iteene kamapoxokonitini hïte. Ninirekari ikamaerekaxiniretini hïte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekarri Matamatakoti posotiireẽ himarotari ikara.

### *Paoro Teoso Iokanapirena Erekarri Sãpiretakari Xoteo Minakonimoni*

<sup>14</sup> Nitariakori, nota imarotari ereka hinini. Nimarotari hïte iteene kimarore hinini hõerekakakiniua ïkapani. <sup>15</sup> Iuaritika ia niõkatsopatakitiã nõtãkikapekai hïte nitaparax-inireritika. Himarotakiti, iuaïkana nisãpiretai, iuaïkana hïxinikiniri ïkapani. Teoso sikari erekarri notamoni, ininiã ikara atoko niõkatsopata hïtemoni. <sup>16</sup> Teoso sikari erekarri notamoni, kotxi itxïkitakano Xesosi Kristo nitiri nininiua. Ipaniãtano nipariãkautini Xoteo minakaniua ïkapani. Sasetotxi apakapari kãkiti mïkiti,

ininiã sika itxari Teosomoni. Ikara atoko itxa sasetotxi parïka. Nota sasetotxi atoko nitxaua. Nisãpiretari Teoso iokanapirena erekari Xoteo minakonimoni, ininiã ninoaka sikaua Teosomoni inireëkiti ikaminina ïkapani. Teoso apakapari ikara atoko inakari ninoaka iuamoni sikakaniua. Erekari Matamatakoti kamaerekatari kãkiti Teoso apakapinina ïkapani.

<sup>17</sup> Ininiã Teoso ïkapani niparïkauatakasaaki, niuikari Xesosi Kristo. <sup>18</sup> Nota kona iuikaua, kotxi Kristo posotiireë Xoteo minakaniua kamari Teoso nireëkiti. Kristo paniãtano nota iua sãkire nisãpiretinina Xoteo minakaniua. Ipaniãtano inireëkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireëkiti. <sup>19</sup> Erekari Matamatakoti posotiireë noerekari Teoso takaõtxikare ninoamoni. Noerekari posotiiretxi kãkiti maposotakinini ninoamoni. Ininiãkara ninoa kamari Teoso sãkire iaõka. Kristo iokanapirena erekari ïkinika nisãpiretapekari kãkiti Xerosareë sitatxiti auakani. Eereka kãkiti apikoxiti auakani nisãpireta. Eereka kãkiti apikoxiti auakani nisãpireta. Nitxaãpota kãkiti nisãpiretini. Imapotõkire Iriria tixinipeka napoka, Kristo iokanapirena erekari nisãpiretini ïkapani. <sup>20</sup> ãtipirika ninirekari nisãpiretiniri Kristo iokanapirena erekari Kristo mimarotakoniãtaã. Ininiã kona niparïkauata Teoso ïkapani ãti parïkauatiniãtaã, kotxi ãti sãpiretapekari Kristo iokanapirena kãkiti iuaãtaã. <sup>21</sup> Kotxi Teoso sãkire iõkatsopatakori txari:

Mitxi iua masãpiretakoni imarotariko iua sãkire.

Mitxi iua sãkire makenakotakani imaro-



tariko iua sãkire,  
itxa Teoso sãkire iõkatsopatakori.

<sup>22</sup> Kaiãokataikani ninirekamari nisini hĩtemoni, txamari kona apakata, kotxi iuasaaki nisãpiretari Kristo sãkire Kristo sãkire mimarotakanimoni.

*Paoro Seenetini Homamoni*

<sup>23</sup> Itokanani ninirekamari naõkitinii hĩte. Uatxaika apakata nisini hĩtemoni, kotxi nixipokapekari nipariõka ãkorapokoriti. <sup>24</sup> Nirekari Espãnia tixinimoni nisini. Iuaã nisikasaaki, ninirekari naõkitinii hĩte. Ninirekari mapaõti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espãniamoni nisini ãkapani, ininiã eereka Espãnia tixinimoni nisa. <sup>25</sup> Uatxa hĩtemoni nisini apisapanika, nisa Xerosareẽmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ãkapani. <sup>26</sup> Kristo sãkire auiãkani, Xoteo minakanuia Masetõnia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxitiã. <sup>27</sup> Ninoa poxokoniua oa txineiro isikinina Xerosareẽ auakanimoni. Erekarini oa txineiro isikinina, kotxi Xoteoakori Kristo sãkire auiãkani sikari Teoso sikakiti Teoso iokanapirena erekari Xoteo minakonimoni. Ininiã erekari Xoteo minakanuia sikiniri ipixini itxineirotena Teoso sikakito, Xoteoakorimoni. <sup>28</sup> Ininiã oa txineiro nanika Xerosareẽ auakanimoni. Ninoamoni txineiro nisika atoko, ininiã eereka nipotorika Espãniamoni nisini. Espãnia napokini apisapanika nisako hĩtemoni. <sup>29</sup> Ereẽ napokasaaki, nisãpiretai ikini sereti erekari Kristo sikakiti hĩtemoni.

<sup>30</sup> Nitariakori nota amanaãi hĩte, himisãkiretiniri Teoso nota ĩkapani. Hikenakotatari namanaãkiti? Himisãkiretariko Teoso nota ĩkapani. Xesosi Kristo aãũte itxaua, ininiã namanaãi himisãkiretiniri Teoso nota ĩkapani. Erekarĩ Matamatakoti txĩkitakaua atiraõkiuatini, ininiã himisãkiretari Teoso nota ĩkapani. Ikara atoko hĩkaminiã, Teoso sikataparatanõ nimisiritiko auakasaaki.

<sup>31</sup> Kristo sãkire mauiãkani Xotéia tõpa auakani nirekarĩ imisiritinino nota. Himisãkiretari Teoso ninoa mamisiritakanino ĩkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakaniua iokanatakito. <sup>32</sup> Ininiã Teoso nirekiniãri, napoka hĩtemoni nipoxokoniritika. Ininiã asikapoxokonitakakaua. <sup>33</sup> Teoso akamaerekaxiniretakiri aua hĩtekata. Ameẽ.

## 16

### *Paoro Akiriuãkaãpotana Ixinikakini*

<sup>1</sup> Niokanataro aĩtaro Pepi inakoro hĩtemoni. Peerekaro oa. Omoianatana Xesosi sãkire auiãkani Sẽkireia sitatxiti auakani. <sup>2</sup> Apiananiri nakito otxaua, ininiã hãpakaparoko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

<sup>3</sup> Hĩsãpiretanako Pisisira, oĩtaniri Ákira pakini nixinikamanapitinina ninoa. Ninoa parĩkauatapeka Kristo Xesosi ĩkapani notakata. <sup>4</sup> Okaãkanapanokana nota imoianatinina xika. Peerekana, kotxi erekari ikaminanona. Xoteo minakaniua, ikini Teoso misãkiretikoãtaã

apotiitakaniua apaka imarotari erekari Pirisira, Ákira pakini kamakiti nota ĩkapani. <sup>5</sup> Xesosi sãkire auiãkani apotiitaua ninoa aapoko Teoso imisãkiretinina ĩkapani, ininiã hĩsãpiretanako nixinikamanapitinina ninoa.

Hĩsãpiretariko nitiretakiti Epeneto inakori nix-inikamanapitiniri iua. Ásia tixiniã iua merepiti-panika auikari Kristo sãkire. <sup>6</sup> Hĩsãpiretaroko Maria nixinikamanapitiniro oa. Oa iteene parĩkauata ate ĩkapani. <sup>7</sup> Hĩsãpiretanako ninirimane Ātoróniko, Xónia pakini nixinikamanapitinina ninoa. Mitx-ipe ninoa aua notakata kateia ãki. Teoso kãkitimoni iokanatakini iteene imarotana Ātoróniko, Xónia pakini. Ninoa ipi auikari Kristo sãkire, iua sãkire nauikini apisapanika.

<sup>8</sup> Hĩsãpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. <sup>9</sup> Hĩsãpiretariko Opano nixinika-manapitiniri iua. Iua parĩkauata Kristo ĩkapani atekata. Hĩsãpiretariko nitiretakiti Esitaki nix-inikamanapitiniri iua. <sup>10</sup> Hĩsãpiretariko Aperi nix-inikamanapitiniri iua. Imisiritiko sauaki iua ! ikipatari Kristo sãkire auikini. Hĩsãpiretanako Arisitóporo aapoko auakani nixinikamanapitin-ina ninoa. <sup>11</sup> Hĩsãpiretariko ninirimane Erotxião nixinikamanapitiniri iua. Hĩsãpiretanako Api-ananiri nakitiakori Nasiso aapoko auakani nix-inikamanapitinina ninoa.

<sup>12</sup> Hĩsãpiretanako sitoakoro Tipena, Tiposa pakini nixinikamanapitinina ninoa. Ninoa parĩkauatapitipo Apiananiri ĩkapani. Hĩsãpiretaroko nitiretakito Pesitxi nixinikamanapitiniro

oa. Oa apaka parĩkauatapitipo Apiananiri ĩkapani. <sup>13</sup> Hĩsãpiretanako Hopo, inoro pakini nixinikamanapitinina ninoa. Apiananiri mereeri iua. Iua inoro tiretano nota, ninoro tiretinino atokotxikana. <sup>14</sup> Hĩsãpiretanako Asĩkiriti, Pirekõtxi, Émisi, Pataropa, Émasi, ikinika aĩtariakori ninoakata apotiitakaniuua pakini nixinikamanapitinina ninoa. <sup>15</sup> Hĩsãpiretanako Piróroko, Xória, Nereo, Nereo itaro, Orĩpa, ikinika Teoso nakitiakori ninoakata apotiitakaniuua pakini nixinikamanapitinina ninoa.

<sup>16</sup> Himaaratakakauako, kotxi aĩtaritakakaua. Kristo nakitiakori ikini Teoso misãkiretikoãtaã apotiitakaniuua xinikamanapitai hĩte.

### *Paoro Ôtãkikare Mapotõkire*

<sup>17</sup> Nitariakori iteene nõtãkikai hĩte. Erepaniko kãkiti neenamatchi nireekani. Ninoa nirekari Kristo sãkire auiãkani omanatinina apanakini Kristo sãkire auiãkani. Na atão ninoa oerekakiti sãkiretxiti, ininiã atxiĩti kãkiti takanapari Kristo sãkire auikini ninoa oerekakiti xika. Kristo sãkire nota oerekakiti hĩtemoni atão. Ninoa oerekakiti koketakori sãkiretxiti. Ninoa moianariakori kona hĩtxapeua. <sup>18</sup> Kãkiti ikara atoko inakani kona parĩkauata aãũte Kristo ĩkapani. Ninoa parĩkauata ĩĩtona nireekiti ĩkapani. Imisirienetarina kãkiti sãkire auiãkani. Imisirienetarina kãkiti ikara atoko inakani, kotxi kãkiti potxitari isãkirena. Kãkitimoni peerekari ninoa sãkire. <sup>19</sup> Ikinika kãkiti imarotari hĩte kaminiri Kristo sãkire iaõka, ininiã nota iteene poxokoniuata hĩte ikara atoko hininiã. Ninirekari kiĩkite hinini erekari hĩkamini ĩkapani. Ninirekari himimarotakaniri maerekati

hīkamini. <sup>20</sup> Teoso akamaerekaxiniretakiri, paītiki xipokariko Satanasi posotiire, ininiã hīposotari hīokanatiniri Satanasi isini.

Aãuīte Xesosi Kristo ātipirika sikari ikinipoko erekari hītemoni.

<sup>21</sup> Tximótxio, notakata parīkauatakari, xinikamanapitai hīte. Ninirimane Arósio, Xasão, Sospato pakini xinikamanapitai hīte apaka.

<sup>22</sup> Nota Tésio inakori iōkatsopatari ia iōkatsopari Paoro ĩkapani. Nota apaka xinikamanapitai hīte, kotxi Apiananiri nakiti nitxaua.

<sup>23</sup> Nota Paoro aua Kaio aapoko. Kristo sãkire auiãkani apotiitaua iua aapoko Teosokata isãkirauatinina ĩkapani. Iua nirekari himarotini iua xinikamanapitini hīte. Erásito inakori apaka xinikamanapitai. Txineiro nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

<sup>24</sup> Aãuīte Xesosi Kristo ātipirika sikari ikinipoko erekari hītemoni. Ameẽ.

<sup>25</sup> “Peerekari Teoso,” matxako. Iua posotari ikamataparaxiniretinii hīte, ininiã kona hīotokakari hãuikiniri Kristo sãkire. Teoso iokanapirena erekari nota sãpiretakiti, Xesosi Kristo sãkire pakini sãpiretari ikara atoko inakari. Ikara Teoso sãkire kitxakapirīka !kimarotikori. Uatxa imarotapeẽkaika. <sup>26</sup> ĩkorasaaki asãpiretapekari ikara Teoso sãkire, Teoso sãkire sãpiretakani iōkatsopatakiti kitxakapirīka. Uatxa aimarotari ninoa sãpiretakiti. Teoso auapika inakari paniātari isãkire sãpiretiko ikini itixiti auakanimoni. Ininiã apakata ikinimane auikiniri isãkire. Apakata ikinimane kaminiri inireẽkiti iaõka.

<sup>27</sup> Iuanani Teoso txaua. Iuanokara imarotari atão ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameẽ.

**Teoso sãkire amaneri**  
**New Testament in Apurinã (BR:apu:Apurinã)**

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

**Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
253eaec7-f0c7-5b49-b6be-65ee5354d0ed